

AU LEOLEO 2017



'Ia Tatalo ma Mataala'

UPU TOMUA

Ia i le Atua, Tolu Tasi Paia le viiga ma le faamanu e amata atu nei e oo i le faavavau, faavavau lava, auā o lona alofa tunoa, ma lona aao malosi sa tauto’aluaina ai la tatou folauga mai lena tausaga ua mavae atu, o lea ua tatou tau manuia mai ai i lenei tausaga fou i lona filemu.

E avea lenei avanoa e faatalofa atu ai i le suafa o lo tatou Alii Toe Tu manumalo i le paia o le Ekalesia, le mamalu o le Aufaigaluega, faapea tagata lolotu, aemaise le Mafutaga Tatalo a le Au Leoleo. Talofa! Talofa Lava! Malo folau! Faafetai galulue! Malo tatalo!

Ia manatua pea le autu ma le faamoemoe o la tatou Mafutaga Tatalo; “O le tuuina atu lea o tatou tagata atoa ma mea uma tatou te faia i le leoleoga ma le tausiga a lo tatou Atua.” E le gata ina puipuia lo tatou saogalemu i le tino, a ia sili ai ona leoleoina o tatou agaga, ina ia tatou faia pea lona finagalo i aso uma e le aunoa.

E faamauina le faafetai i le Susuga a le toeaina Mafutaga Faaleaoga o le Matagaluega a Niu Sila ma Ausetalia ona o le saunia o lenei tusi mo sauniga o lenei tausaga. Malo tapena!

Ia o lenei tusi ua na o se ta’iala, ae talitonu le manatu e matalasi meaalofa a le Agaga e lagolagoina ma faaatoatoaina ai tatalo ma talosaga o le a saunia ma faia e le au fai tatalo i soo se mea ma mea uma i soo se taimi.

Tatala lou finagalo i le faaali mai o le Agaga o le Atua e ala i ana Afioga e faavae ai a tatou tatalo.

Ia faamanuia le Atua i le folauga a la tatou Ekalesia i lenei tausaga, ae a le feagai ai ma tiute eseese aemaise Mafutaga Tatalo a le Au Leoleo. Ia aualiitia e le Agaga o le Leoleo Mamoe Sili e manuia ma saogalemu ai mea uma tatou te faamoemoe i ai ma faia.

Tautalatasi Fanolua FT
Peresitene, Mafutaga Au Leoleo

TA'UTINOGA MAFUTAGA AU LEOLEO

Ou te ta'utino atu, o le Mafutaga a le Au Leoleo, o le mafutaga tatalo a le Ekalesia, e galueaina ai le ola faaleagaga o le 'au faatuatua i le Atua.

Ou te ta'utino atu foi, o le Atua o le Agaga lava ia, e su'eina o tatou agaga ma fuatia o tatou loto.

O le mea lea ou te ta'utino atu, o le a ou su'esu'e ifo i lo'u ola, ma ou toaga i mafutaga tatalo ma tapuaiga, atoa ma mea fai uma a le Ekalesia. Ina ia ou le tama/teine pea i le faatuatua, a ia oo i le ua matua i le agaga.

Ou te ta'utino atu o le a fai ma a'u tatalo tauave:

*Le Alii e, ia e alofa mai ia te a'u le tagata agasala. Ia e foai mai le loto tele e suia ai mea ua tatau ona sui, ma le to'afilemu e talia ai mea e lē tatau ona suia, ma foa'i mai le atamai e iloa ai le eseese o ia mea. Ia oo mai lou malo, ma ia faia lou finagalo i le lalolagi e pei ona faia i le lagi. **Amene!***

IANUARI

Ianuari 1 - 7, 2017
Tusi Faitau: 1 Ioane 1: 5-10

f. 9: “.... a e afai tatou te tau atu a tatou agasala, e faamaoni o ia, ma le amiotonu e faamagalo ai a tatou agasala, ma faamamā mai ia i tatou i amioletonu uma lava.”

Autu: Salamō, o le tagata fou lea i luma o le Atua
Faafetai i le Atua:

- i. I le avanoa ua maua i le salamō, ua avea ma ala e faafouina ai le mafutaga ma ia e ala i lona alofa tunoa.
- ii. Ona o lona malamalama, ua faamalamalama mai i o tatou ala pogisa na ui mai ai i le tausaga ua tuanai.
- iii. Aua ua faapalepale mai ia tatou agasala ma faamagaloina, ua fou ai le malosi e amata manuia ai lenei tausaga fou.

Faatoese i le Atua:

- i. Ina ua le tumau i tatou i lona finagalo, ua le faaauauina foi lo tatou ola salamō i aso uma.
- ii. Auā ua numia pea i tatou i le pouliuli o lo tatou ola tu’inanau ma le lē faatuatua, ua tatou le tumau ai i le salamō faapei ona ia faafou mai i lo tatou ola o aso uma.
- iii. Ona ua tala pepelo a tatou folafolaga mo se olaga fou ma suiga e ao ona faia, ona o le le faamaoni.

Tatou tatalo i le Atua:

- i. Ia faamalulū mai o tatou loto, ia fua mai ai galuega o le salamō ao savalia le amataga o lenei tausaga.
- ii. Ia faamanuia mai la tatou savaliga, ia i ai lona malamalama e taitaiina atu i tatou i lona alofa

- tunoa ma fanaufouina ai pea i tatou i aso uma, ma taimi uma tatou te manavaina ai le ola.
- iii. Ia ola pea le finagalo o le Alii toe tu i mea tatou te faia e tautuaina ai lona finagalo o aso uma.

Ianuari 8 - 14, 2017
Tusi Faitau: Kolose 1: 3-10

f. 9, 10 “O le mea lea o i maua foi ma te lei mapu ai i le tatalo mo outou, talu le aso na ma faalogologo ai, ma te aioi atu foi ina ia atoatoa ona outou iloa lelei lona finagalo i le poto uma atoa ma le mafaufau faaleagaga, ia outou savavali e tusa ma le Alii, ina ia fiafia mai o ia ia te outou i mea uma ma ia outou fua mai galuega lelei uma lava, ma ia tupu pea lo outou iloa lelei o le Atua.”

Autu: Ia tutupu i le finagalo o le Atua

Faafetai i le Atua:

- i. Ona o Iesu Keriso ma lona soifua, ua avea ma manuia mo tagata uma o le lalolagi; o e ua faatuatua ia te ia
- ii. I lona faaali mai ia i tatou i ana Afioga ola, ua tatou tutupu ai i lona finagalo
- iii. Aua ua avea le faaali mai o lona finagalo sa lilo, ua tatou maua ai le atoatoa o le ola, ina ua usitai atu ia Keriso.

Faatoese i le Atua:

- i. Ina ua faafoliga lo tatou olaina o le finagalo o le Atua i mea ua tatou faia
- ii. Ia faamagaloina lo tatou faalotolotolua ua tatou le tutupu ai i le finagalo o Keriso
- iii. Ia faamagalo mai lo tatou palaa'i e faia lana amiotonu i nofoaga ua moomia ai, ona o le faafefeina o lo tatou saogalemu i le malosi o tagata.

Tatou tatalo i le Atua:

- i. Ia foai mai le loto tele e tutupu ai le faamaoni ma faia pea lona finagalo i aso uma.

- ii. Ia maua e tagata o le Ekalesia le agaga o tofiga a Keriso mo ana feau, i tofi ua valaauina ai i soo se matātā ua tofia ai.
- iii. Ia tatou iloa ona tuuina atu o tatou ola ma taimi mo le Atua i aso uma. Ia faia foi ma faataitai o le ola ua fanaufouina i nisi o mulimuli atu ia Iesu, ma nisi e le o taliaina lona alofa tunoa.

Ianuari 15 - 21, 2017
Tusi Faitau: 1 Samuelu 16: 1-7

f. 7 “A ua fetalai mai le Alii ia Samuelu, Aua e te vaai i lona tino, po o le maualuga o lona tino, auā ua ou tetee ia te ia; auā e le vaai le Alii pei ona vaai o tagata, auā e vaai tagata i le tino, ae vaai le Ali’i i le loto.”

Autu: E finagalo le Atua i lou loto

Faafetai i le Atua:

- i. Ona o lona a’oa’o mai ia i tatou i ala e manuia ai, e ui i le le faamaoni o tatou loto
- ii. Ona o le galuega mana a lona Agaga Paia; ua musuia o tatou loto e faia le mea lelei e ola ai
- iii. Ona o le faaali mai i o tatou loto o faaiuga manuia o lona finagalo, ua faamanuiaina ai mea tatou te faia

Faatoese i le Atua:

- i. Ina ua leo tele mai Satani ia i tatou, ma tatou mulimuli atu i mea leaga, ae tu’ua lona finagalo alofa e manuia ai
- ii. Ia faamagaloina lo tatou loto malō ma le faigata, ua teena ai lona Agaga Paia ma lona faaali mai.
- iii. Ina ua faale-tino lo tatou iloa o mea e faia, a ua tatou le iloa le itu faale-agaga o mea ua tatou faia.

Tatou tatalo i le Atua:

- i. Ia faia o tatou loto ma eleele lelei e tupu ma ola ai lona finagalo



- ii. Ia fesootai atu o tatou loto i lona faaali mai, e taitaiina ai o tatou ola i aso uma.
- iii. Ia faatumau mai i o tatou loto lona faamaoni ma lana amiotonu, ia fou ai pea lo tatou malosi o aso taitasi.

Ianuari 22 - 28, 2017
Tusi Faitau: Mareko 10: 42-45

f. 43 “.... A o se fia sili ia te outou, ia fai o ia ma a outou auauna; ...”

Autu: Ola e auauna i le Atua

Faafetai i le Atua:

- i. Aua ua uma ona ia tuuina mai le faataitaiga o le ola auauna, e ala i le soifua o Keriso i le lalolagi
- ii. I avanoa eseese ua tatou auauna atu ai mo lona finagalo i aso uma, ma manuia ua faia ai i tatou ma ona aao faaola mo isi
- iii. Ona o lona alofa na afio mai ai i le laolagi, ua lavea’i mai lo tatou ola i lona maliu ma lona toetu, ua avea ma faamoemoe fou o le tagata tautua

Faatoese i le Atua:

- i. Ia faamagaloina lo tatou le iloa ona auauna atu, aua ua na o lo tatou fiafia e auauna mai tagata
- ii. Aua ua o eseese a tatou upu ma lo tatou ola, auā ua tatou naunau i tau i e maua mai i lo tatou ola auauna
- iii. E faamagaloina lo tatou tautua pa’o ma le gutuā, aua ua tatou faamuamua i tatou i faasoā ua maua, ae faamulimuli i le Alii i mea tatou te fai

Tatou tatalo i le Atua:

- i. Ia tatou iloa ona fesoasoani, auauna atu ma faia lona finagalo i aso uma tatou te faia ai ana feau
- ii. Ia foai mai le malosi i le tino, mafaufau ma le agaga tatou te tautua ai i tofiga ua valaauina ai i tatou

- iii. Ia faamanuia i taitai o Malo, atunuu, nuu ma aiga faapea lana Ekalesia, ia fai ma faataitaiga lelei o le ola auauna i tagata ua latou auaunaina.

FEPUARI

Ianuari 29 - Fepuari 4, 2017

Tusi Faitau: Salamo 41:1-7

f. 4 “...Na ou fai atu, Le Alii e, ia e alofa mai ia te au; ia e faamalolo i lou agaga; aua ua ou agasala atu ia te oe...”

Autu: Ua na o le Atua e faamaoni ai le suia o i tatou

Faafetai i le Atua:

- i. Ona ua liua o tatou mafatiaga o lena vaiaso i galuega e fai ma olioli.
- ii. Ona o le malosi ua tuuina i o tatou loto, e iloa atu ai le malamalama o le faamoemoe fou e ala i lona fesoasoani mai.
- iii. I ana Afioga Paia, ua tatou faitau ma faamanatu mai lona alofa e sili i so tatou mafatia

Faatoese i le Atua:

- i. Ia faamagalalo mai lo tatou le faatuatua i taimi tatou te mafatia ai.
- ii. Ina ua saili i faataulaitu ma alii o le lalolagi le fofo o o tatou faafitauli ae ua galo le faaali mai o le Agaga i mea e manuia ai.
- iii. Ona ua le faamaoni le tagata, aua ua iloa saili atu ia manuia, ae galo le faafetai ina ua manuia.

Tatou tatalo i le Atua:

- i. Ia faamanuia ia i latou uma o aafia i soo se mafatiaga, ia pupula atu lona matagofie i e o ufitia i le pogisa o faanoanoaga ona o ma'i ma tigā e oo i le oti.

- ii. Ia le faafefeina e puapuaga e mavae le ola faatuatua o le kerisiano, ia maua’ a pea i le Keriso manumalo.
- iii. Ina ia faaalua pea lona mana i togafitiga e saili i ai le tagata i le malosia ona o mafatiaga i ma’i; ma puapuaga e feagai ai i aso ta’itasi.

Fepuari 5 - 11, 2017
Tusi Faitau: Numera 6:22-27

f. 25, 26 “...ia faamalamalamaina e le Alii ona fofoga i luga ia te oe, ma alofa atu ia te oe; ia faasaga mai e le Alii ona fofoga ia te oe, ma tu’uina atu ia te oe le manuia.”

Autu: O i tatou o tagata ua faamanuiaina e le Alii
Faafetai i le Atua:

- i. Ona o ona manuia ua tatou maua o aso taitasi, ua faatinoina ai manaoga o lo tatou ola o aso uma.
- ii. Ua amanaia ma faaaogaina i tatou i ana feau paia, ua avea ma manuia ia i latou ua tatou auauna i ai.
- iii. Ona o le taulaga ua faia e Keriso i lona soifua, ua manuia ai le lalolagi uma ma maua ai le ola faamagaloina.

Faatoese i le Atua:

- i. Ia faamagaloina lo tatou manatu faapito ua le mafai ai ona tatou tuuina atu manuia o le Atua mo e o mo’omia.
- ii. Auā ua le faamaoni tatou i ana feau, ma lo tatou avea ma ana auauna e faao’o atu ona manuia i ona tagata.
- iii. Ina ua tauvaleina pea lona finagalo i mea ua tatou faia, ona ua faamuamua taui o galuega ae le o le finagalo o le Atua e afua ai galuega.

Tatou tatalo i le Atua:

- i. Ia faaalua pea lona mana i lo tatou ola galulue i ana feau, ma le upu folafola atu i tagata.

- ii. Ia faamanuia mai ia Samoa ma ona tagata faatuatua uma, ia i ai i o tatou laueleele ma gataifale ma le vanimonimo le ola, ia i ai foi i le Malo o Amerika lona alofa, faatasi ma atunuu ua fesoasoani i lo tatou tamaoauga.
- iii. Ia i ai i lana Ekalesia le mana o lona ‘auai, ia iloa e tagata lona silisili ese ma lona alofa latou te auauna ai ma le loto fiafia e faia lona finagalo.

Fepuari 12 - 18 2017
Tusi Faitau: Salamo 31: 1-5

f. 3 “ Auā o oe lava lo’u papa ma lo’u ‘olo; ia e taitai mai ma tausī ia te au ona o lou suafa.”

Autu: Faalagolago atu i le mana o le Atua e te malosī ai

Faafetai i le Atua:

- i. Ona o lona malosī ma lona mana ua lavea’i mai i tatou i faaiuga tatou te faia mo le manuia o galuega.
- ii. Ina ua avea ma papa maualuga ma olo e malu i ai le tagata mafatia i ona puapuaga.
- iii. Ona ua le faamaina le tagata faatuatua ia te ia, i mea uma ua ole atu ai; ua tali mai ia i tatou i ona ala tatau ua manuia ai a tatou taumafaiga.

Faatoese i le Atua:

- i. Ina ua le manatua e le tagata lona latalata mai e ala i le Agaga Paia, ona ua popole vale i le faia o ana faaiuga.
- ii. Ona ua tatou fao lona viiga ona o mea ua foliga manuia ua tatou faia, aua ua manatu le tagata o lona malosī ua mafai ai.
- iii. I lo tatou saili solo i malosī o le lalolagi e fai ma olo i faafitauli tutupu o le olaga.

Tatou tatalo i le Atua:

- i. Ia aumai le loto faatuatua faamaoni e saili atu ai i lana faasinoga, i soo se taimi tatou te mafatia ai.

- ii. Ia fesoasoani mai lona Agaga i faaiuga lelei mo le manuia o o tatou aiga, ma le faia o lona finagalo e lana Ekalesia.
- iii. Ia tatou iloa le mana galue mai o le Atua i soo se taunuuga o mea ua tatou faia, ia loto maulalo i mea ua faataunuaina, ma loto fiafia i mea ua le mafai ona faataunuaina.

Fepuari 19 - 25, 2017
Tusi Faitau: 2 Koritino 9: 7-14

f. 10 “...O lenei, o le ua foai tele mai fatu saito i le ua lulu ai, ma le areto e ‘ai ai, o le a ia foai tele mai lava a outou saito e lulu ai, o le a faateleina foi e ia le fua o la outou amiotonu;”

Autu: O le malosi o le Atua e atoatoa

Faafetai i le Atua:

- i. Ona ua faamanuia mai ia tatou galuega, ua mafai ai ona tatou foai mo ia ma le loto malie e faia ai ana feau.
- ii. Ona o le foai alofa na ia fai mo tatou tagata agasala, i le soifua o Keriso lo tatou Alii ua avea ma faataitaiga o le alofa.
- iii. Ona o le tamaoaiga ua tatou maua o aso taitasi, ua fai lea ma manuia mo le tagata; aemaise i latou ua tatou faasoa atu i ai.

Faatoese i le Atua:

- i. Ia faamagaloina le lima mau ma le le loto foai e faasoa ona tamaoaiga, ona o lo tatou manatu faapito.
- ii. Ia faamagalo mai lo tatou pāie e galulue i fanua o ana meaalofa na foai mai tatou te galuea’ina, ina ua faasili lo tatou manatu e ola i mea faigofie.
- iii. Ina ua le mafai ona faaalua lona malosi atoatoa i mea tatou te faia, aua ua masalosalo o tatou loto i galuega ua tatou faia.



Tatou tatalo i le Atua:

- i. Ia faamanuia mai i tatou ma a tatou galuega o loo faia, e faapea foi ma mea tatou te fuafuaina mo le lelei o atinae o aiga, nuu, atunuu ma lana galuega.
- ii. Ia avea lona mana ma manuia e faalototele, faamalosi ma faalaeiau i o tatou loto, i Aso tatou te filifili ai e foai mea uma i le loto malie mo le manuia o nisi ma lana galuega.
- iii. Ia fai ma viiga o lona Suafa Paia, tautua eseese tatou te faia. Ia faamanuia i soo se tasi o naunau e galuea'ina o tatou laufanua, gataifale ma pisinisi mo le atinae o aiga ma le tamaoiga o le atunuu.

MATI

Fepuari 26 - Mati 04, 2017

Tusi Faitau: Filipi 4: 8-13

f. 8 “Le au uso e, o le toe upu lenei; o mea uma ua moni, o mea uma ua ta’uleleia, o mea uma ua tonu, o mea uma ua mamā, o mea uma ua matagofie, ma mea uma ua logoleleia, afai foi o se isi amio lelei, po o se tasi mea e viia, ia outou manatunatu i ia lava mea.”

Autu: Filifili e faia le mea lelei

Faafetai i le Atua:

- i. Aua ua faaalua pea le faamaoni o lana tausiga alofa i o tatou ola, ua manuia ai le tagata i le soifua fetausia’i.
- ii. Ina ua galue mai i o tatou loto e faia ai galuega lelei; ma iloa atu le Atua i le olaga o i latou o moomia la tatou fesoasoani.
- iii. I le faamanatu mai o ana Afioga Paia le le tatau o le manatu faapito, a ia faasili le manatu i le viiga o le Atua e maua ina ua fiafia foi nisi e vivii ia te ia i se galuega ua tatou mafai.

Faatoese i le Atua:

- i. Ia faamagalō mai lo tatou le manatu mamafa i le taua o faaiuga tatou te faia, ma le aafia o lagona saoloto o nisi i mea ua tatou soona fai.
- ii. Ina ua le maua le matamau e foai atu mo le manuia o nisi, ina ua faapito la tatou vaai mo i tatou lava.
- iii. Ia faamagalō mai lo tatou le fiafia e faalogo, ma ua tatou augatata e faia le mea lelei ua uma ona a'oa'o mai mo i tatou.

Tatou tatalo i le Atua:

- i. Ia filifili faatasi pea le tagata ma lona Agaga Paia, e maua ai le faamaoni ma le agaga moni e faia ai mea sili mo lona viiga.
- ii. Ia ola fetausia'i lana fanau ma faailoa atu le fealofani ua ia poloa'iina ai lana Ekalesia ia faatinoina.
- iii. Ia loto malie le tagata i manuia o le Atua ua ia te ia, ia le losilosī vale ma tu'ianu e oo atu ai i le malaia.

Mati 5 - II 2017

Tusi Faitau: Teuterēnome 31: 7-8

f. 8 "...O le Alii foi o ia na te savali i ou luma, lua te faatasi ma ia, na te le tuuna oe, na te le lafoa'i ia te oe, aua e te fefe aua foi e te matau."

Autu: O le filemu o le Atua

Faafetai i le Atua:

- i. Ona o lona filemu ma le toamalie tatou te maua i taimi e vesia ai i mea tutupu o le olaga.
- ii. I le loto tetele o ana auauna e na muamua ia i tatou, ua maua ai i o tatou taimi le toamalie i le faia o galuega.
- iii. Ona o le galuega mana a le Agaga Paia, ua mafai ona tuu faatasia ai loto na eseese, ma

manatu ua le mautonu, ua mautu ai le alofa i le va o tagata, atunuu, Malo ma lana galuega.

Faatoese i le Atua:

- i. Ina ua le maua le filemu i le lalolagi, ona o le tagata i le fiasili, le fiapule ma le loto faamaualuga.
- ii. Ia faamagaloina le ola faatupu vevesi ma le loto fia mama, ae ua na ona faafoliga i ona luma le ola o le tagata.
- iii. Ia faamagalo mai lo tatou palaa'i e faia faaiuga tonu e atagia ai lona finagalo, ina ua tatou manatu e faafiafia ma au atu i tagata i mea le sa'o.

Tatou tatalo i le Atua:

- i. Ia alofa e foa'i mai le filemu moni e ola ai tagata i Aso uma. Ia mafai ona faia ai ana galuega ma faatino au feau.
- ii. Ia lototele le tagata e galue ma le faamaoni e faataunuu ona tiute i faiva ua valaauina ai.
- iii. Ia iloa e le tagata ona faamaulalo i ona sese, ia aumaia ai lona filemu i taimi vevesi o le ola.

Mati 12 - 18, 2017

Tusi Faitau: Esoto 31:1-11

f. 3 “....Ua ou faatumauiina foi o ia i le Agaga o le Atua, i le potu, ma le faautauta; ma le iloa lelei e faia ai galuega uma lava....”

Autu: O tofiga, e mai le Atua

Faafetai i le Atua:

- i. Ina ua amanaia i tatou ona o tofi ua tatou maua e galulue ai, i aiga, o nuu, o Malo ma lana Ekalesia.
- ii. Ona o le potu ma atamai faapitoa ua tatou maua, e faatinoina ai ia tofiga taua ua tatou galulue ai.



- iii. I le avea ai o tofiga ma ala o ana faasoa tatau mo le tagata i soo se mea ua ola ai

Faatoese i le Atua:

- i. Ia faamagalo le avea o tatou tofiga ma ala ua punitia ai la tatou vaai atu i uso o mafatia.
- ii. Ia lavea’i mai i tatou i le faaaoga sese o tofiga ua tupu ai le ola soona fai ma le fiapule.
- iii. Ia faamagalo mai le teena o le musumusuga a le Agaga i o tatou loto, ua le faamaoni ai faaiuga fai e ala i tofiga ua tatou umia.

Tatou tatalo i le Atua:

- i. Ia foai mai le faatuatua galue e faia ai tiute o tofiga ua tatou galulue ai.
- ii. Ia lautele la tatou vaai i faaiuga tatou te faia mo le manuia o tagata e aafia i tofiga ua tatou maua.
- iii. Ia manuia i latou uma ua galulue i tofi i le Malo, fono faitulafono, faamasinoga, matagaluega eseese, faapea tofi matai i aiga, ma tofi eseese o le Ekalesia a Keriso i le lalolagi.

Mati 19 - 25, 2017
Tusi Faitau: Eperu 13: 7-16

f. 15 “O lenei, o ia tatou te avatu soo ai le taulaga o le viiga i le Atua, o le fua lea o o tatou laugutu, o loo faafetai atu i lona suafa.”

Autu: O Iesu o le taulaga ua atoa o le faaolataga
Faafetai i le Atua:

- i. Ona o lona faamaoni i lo tatou ola, auā e ui i le vaivai ma le agasala o le tagata, a ua le taofia lava lona faamaoni i lo tatou ola i Aso uma.
- ii. I lana Afioga ua faamalamalama mai lo tatou ola masalosalo i le faaolataga na faia e Iesu.

- iii. I lana meaalofo o le faatuatua ua tuuina i o tatou loto, e iloa atu ai lona matagofie le vaايا mo o tatou ola.

Faatoese i le Atua:

- i. Ia faamagalo mai mea ua tatou faalogo i ai ma taitai seseina ai o tatou manatu, ae faagalologo le musumusuga a lona Agaga Paia.
- ii. I lo tatou le tumau i lana faaolataga, ua feseetai ai o tatou olaga i tala ua talaiina mai e nisi, ae ua leai sa tatou goioiga e talai atu le Alii toetu
- iii. Ina ua na ona faaleo le alofa atu, ae ua le mafai ona tatou faatinoina. Ua tatou fiafia e talia lona alofa, ae ua tatou leiloa ona faitaulaga ia te Ia.

Tatou tatalo i le Atua:

- i. Ia a'oa'o mai le faatuatua e mafai ai ona tatou tetee atu uiga ma faiga mataga a Satani i lo tatou ola.
- ii. Ia faamanuia mai i lana Ekalesia ma le galuega talai, ia tumau i le ola faatuatua ma faamoemoe atu i lona Agaga e fafagaina ai i le ola fou ua uma ona ia aumai.
- iii. Ia alofa mai i le atina'eina o lana galuega i totonu o Ekalesia taitasi, ia le avea le ola tautua o tagata ma mea ua faia e faamaualuluga ai; ae ia iloa ona faafoi atu lona viiga.

APERILA

Mati 26 - Aperila 01, 2017
Tusi Faitau: Ieremia 17: 5-8

f. 7: “Amuia le tagata o lē faatuatua i le Alii, o le ua fai le Alii mona faatuatuaga.”

Autu: Ia fua mai le ola i mea lelei

Faafetai i le Atua:

- i. Aua faapei ona ia alofa i lona nuu filifilia, ua faapea lava ona alofa mai ia i tatou ma faaolaina i tatou uma.
- ii. Ina ua tamaoaiga o tatou ola i ana faasoa paia, ua mafai ona gaoioi ai le tagata ma faatino mea ua manao i ai.
- iii. Aua ua fai lona alofa tunoa ma vaitafe tele e faasūsūina ai le ola, ua avea foi ma mana tele e faainumia ai lo tatou galala o aso uma.

Faatoese i le Atua:

- i. Ona ua le fua mai o tatou ola i fua lelei, ae ua fua mai i fua leaga ona ua faalagolago atu i manatu sese o tagata.
- ii. Ina ua faatoilaloina pea o tatou ola i le faamaualuluga ma le fiasili, o se vaivaiga ua le fua mai ai i manatu aoga o lona alofa tunoa.
- iii. Ina ua tatou tuua’i le leaga i nisi, ae ua le iloa ona faia o se galuega o le alofa e laveai ai i latou o saisaitia pea i faiga a le tiapolo

Tatou tatalo i le Atua:

- i. Ia faailoa mai auala lelei e faia, tatou te maua ai fua lelei e faafoi atu ai lona viiga; ai lo tatou ola auauna.
- ii. Ia a’oa’o mai mo i tatou lona alofa tunoa, e malamalama ai lo tatou faatuatua; e utuvai ai

le kerisiano ma tupu talaulau e faailoa lana Talalelei ia laveaiina ai tagata.

- iii. Ia avea lana Ekalesia ma vaiatafe, e tafe atu ai lana faaolataga; ma ia le matutū ona magavai i le alofa, amiotonu, amio mama ma le loto faamagalo; e saili ma faainumia ai se agaga o galala i lana Upu moni.

Aperila 2 - 8, 2017
Tusi Faitau: Luka 22: 39-46

f. 39 “Ua maliu atu o ia i fafo ua savali atu i le mauga o Olive, ua faapea lana masani; ua mulimuli atu foi ona soo ia te ia.”

Autu: Ia fai ma masani le ola tatalo.

Faafetai i le Atua:

- i. Ona o le ala ua faasino mai tatou te fesooteai atu ai; faapei ona faia e Keriso lo tatou Faaola.
- ii. Aua ua tali mai i lo tatou valaau atu i soo se mea i lona lava finagalo, ua faamalie i o tatou manao; ua ia foai tatau foi e tusa ma mea ua tatou ole atu ai.
- iii. I le faamanatu ma faamalosi mai o le faamoemoe fou i tala atu o puapuaga, faapei ona faamalosi atu i lona au soo, ina o maua i latou o momoe, ona o le tiga i le alofa.

Faatoese i le Atua:

- i. Ia faamagalo mai lo tatou le fesooteai atu i le tatalo i Aso uma, ae faatoa manatua lona alofa ina ua tatou mafatia.
- ii. Ina ua sulufai solo le tagata ina ua mafatia ma saili fesoasoani i lona malosia, ae faagalo o Ia e faaali mai ala e mapu i ai le mafatia.
- iii. I lo tatou vaivai gofie i le moe ma fai ma alofaga lo tatou vaivai, e le faataunuuna ai tiute e tatau ona tatou faia.

Tatou tatalo i le Atua:

- i. Ia foai mai le mataala e mafai ai ona tatou faia o mea sili e ao ona faataunuuina, o o tatou tiute i tofiga ua valaauina ai i tatou.
- ii. Ia fesoasoani mai a o tatou taumafai mo lana galuega, ia faaauauina ona manuia i soo se ala ua tatou taumafai i ai; e atia'e ana feau.
- iii. Ia avea ma masani lo tatou fiafia e fesootai atu i tatalo i Aso uma, ma ia sili ona faaalua lona mafuta mai i faaiuga tatou te faia.

Aperila 9 - 15, 2017
Tusi Faitau: Luka e 23: 6-12

*f. "Ua toe lelei o Pilato ma Herota i lea lava Aso,
aua sa mua'i feitagai i laua."*

Autu: Ua aumaia e Iesu le leleiga i ona puapuaga

Faafetai i le Atua:

- i. Ona o puapuaga o Keriso ua fai ma faaola ma leleiga i tagata sa eseese.
- ii. Aua e ui i puapuaga o Keriso mamafatu, ae ua a'oa'o mai ona mafatiaga i o tatou olaga ia pupula atu pea la tatou amio e tatau.
- iii. I le faamoemoe lelei o le faaolataga ua uma ona faia e Iesu mo le tagata agasala.

Faatoese i le Atua:

- i. Ona ua le mafai ona faaalua le nofo fealofani i o tatou olaga kerisiano; ina ua pulea o tatou loto e le ita.
- ii. Ia faamagalo mai i tatou i le le loto faamagalo ia i latou o ita mai, ma avea i tatou ma o latou fili.
- iii. Ina ua galo i le kerisiano puapuaga o le Alii, e sili atu le mafatia i le faifai mai o tagata; ma le fia tau i atu ma sui.

Tatou tatalo i le Atua:

- i. Ia pulea o tatou loto i le alofa o Iesu, e naunau ai pea i mea e lelei; ae le o le agaleaga atu.
- ii. Ia sili lo tatou loto maulalo e maua ai le nofo lelei, nai lo le naunau i le fia tau ma sui e tupu ai misa.
- iii. Ia foai mai le fiafia e faia ai lona finagalo ma agaleagaina faatasi ona o se mea lelei, i lo le faia o amio mataga e faafiafia i uo e faia ai le tuinanau.

Aperila 16 - 22, 2017
Tusi Faitau: Ioane 20: 24-29

f. 26 “ ... Ia outou manuia ”

Autu: Ua avea le toetu o Iesu ma manuia i tagata
Faafetai i le Atua:

- i. I le faamoemoe fou ua aumai e le toetu o Iesu Keriso i le tagata, ua fai ma malosi fou i le feagai ai ma faigata o le olaga.
- ii. I le malamalama o le toetu o Keriso, ua avea ma manuia ia i latou uma ua talia ma faatuatua i ai.
- iii. Ona ua avea le toetu o Iesu Keriso ma fafagu i Kerisiano uma, o le taliaina o le faaolataga e le gata i mea ua vaai i ai, ae faapea foi i le faatuatua i mea ua uma ona folafola mai e Iesu mo lana Ekalesia.

Faatoese i le Atua:

- i. I lo tatou masalosalo vale ma le ola le talitonu, ua avea ma auupega a le tiapolo e faavaivaiina ai le talalelei ua aumaia e Iesu.
- ii. Aua ua tatou faalogo ae le lagona, ua pupula foi ae le iloa le alofa o le Atua ua faia i o tatou olaga.

- iii. Ia faamagloina o tatou loto ua le iloa ona manuia ua faamanuia mai ai; aua ua na ona fiafia e talia ae le iloa ona faafetai.

Tatou tatalo i le Atua:

- i. Ia susulu mai le malamalama o le toetu o Keriso, e faamalamalama i o tatou loto masalosalo.
- ii. Ia fai le toetu o Iesu ma manuia i tagata uma; ia maua ai le nofo fealofani ma le galulue faatasi o e sa fefulituaa'i.
- iii. Ia faamanuia i lana galuega faamisionare, ia laveaiina le lalolagi pogisa ma faaolaina i le mana o le toetu.

Aperila 23 - 29, 2017
Tusi Faitau: Roma 8: 1-8

f. 5 "Aua o e i la le tino e loto atu i latou i mea a le tino; a o e i la le Agaga e loto atu i mea a le Agaga."

Autu: O i tatou, o tagata o le Atua.

Faafetai i le Atua:

- i. Ina ua avea i tatou ma tagata faaolaina, ona o le togiola ua uma ona faia e Iesu i lona soifua paia.
- ii. Aua ua fai le Ekalesia ma molimau o le faaolataga, ua tau aogaina ai o tatou ola ina ua fai tatou ma totino o lona tino paia i le lalolagi.
- iii. I lona alofa ua ala mai i le Agaga Paia, ua fesoasoani i faaiuga tatou te fai mo le manuia o tagata ma lana galuega faaola.

Faatoese i le Atua:

- i. Ona ua matele o tatou ola i le faaletino e le tumau, aua ua saili le tagata i le faaviivii mai o tagata i mea tatou te fai.

- ii. Ona ua leotele mai galuega a le tino, ua tatou le lagona ai le musumusuga paia a lona Agaga i o tatou loto.
- iii. Aua ua fasitoia pea o tatou ola i tuinanau leaga; ua pulea foi e manao lasi ma le loto faamaualuga le vaai atu i uso puapugatia.

Tatou tatalo i le Atua:

- i. Ia fai o tatou loto ma nofoaga o lona Agaga, e tupu ai mea lelei ma avea ai pea i tatou ma tagata o le Atua.
- ii. A faavaivaia i tatou e manao o le tino, ia laveai mai i tatou ia le sese, ma le fano o tatou ola i faasoosoga e malaia ai.
- iii. Ia fesoasoani mai i faaiuga tatou te faia, ia foai mai le gagana e momoli ai manatu aogā; ina ia malamalama ai tagata ma mulimuli atu ia te Ia.

ME

Aperila 30 - Me 06, 2017

Tusi Faitau: Iuta 2-4

f. 3 “ Le au pele e, o loo ou matua faamalosi e tusi atu ia te outou i le faaolataga ua tuu tele, ua tatau ai lava ona ou tusi atu ia te outou, ”

Autu: Ia fesoasoania’i i le faatuatua.

Faafetai i le Atua:

- i. Ona o le sao tāua o i latou o e na muamua ia i tatou, ua faasoa mai le talalelei o le faaolataga.
- ii. I lana meaalofa o le faatuatua ua faatuputeleina i le toetu o Keriso; ma le folafolaina atu e le Ekalesia ua faaolaina ai augatupulaga.
- iii. Aua e ui i mea e tele ua lu’iina ai le talalelei ma vaivai ai nisi ua tatou taufetuli faatasi, ae

ua ia saunia auala laulelei e susulu atu ai lona malamalama mo le lalolagi uma.

Faatoese i le Atua:

- i. I galuega le atoatoa ua tatou faia ona o le itiiti o le faatuatua, ma le fevaavaaia’i i mea ua faia e isi.
- ii. Ona ua le mafai ona faasoa atu le faatuatua i laveaiina ai nisi, aua ua pulea o tatou loto i le palaa’i ma le faavaivai i e matamata mai.
- iii. Ina ua avea o tatou tulaga ma olo tatou te lalafi ai, ua le mafai ai ona fesoasoani i nisi o mafatia ma vaivai i le ola faatuatua.

Tatou tatalo i le Atua:

- i. Ia faailoa mai auala e faasoa atu ai le faatuatua, ia mafai ona laveaiina ai ona tagata i sa tatou galuega e faia.
- ii. Ia foai mai le lototele e tetee atu ai i le leaga, ma le loto fiafia e faatino lona finagalo; aemaise le loto onosai e feagai ai ma tiga o le ola faatuatua pe a faafefeina le faamaoni ma le amiotonu i le pule sauā a nisi.
- iii. Ia faamanuia i le galuega a le Ekalesia Aoa ma aulotu taitasi, ao talaiina atu le talalelei ia faatuatua tagata ma tumau i le Atua.

Me 7 - 13, 2017

Tusi Faitau: 1 Korinito 1: 26-31

f. 28 “Ua filifilia e le Atua mea maulalo ma le faatauvaā i le lalolagi, e oo i mea e leai, ina ia lafotuina mea o i ai.”

Autu: O Keriso lo tatou malosī sili.

Faafetai i le Atua:

- i. Aua ua leai se tasi e faatauvaā i lona finagalo, ina ua tutusa tagata uma i lana silafaga paia.

- ii. Ona o lona alofa ua a'oa'o mai i le tagata i amio e tatau, ma faatonu ai i ona ala ia loto maulalo i meaalofa ua ia te ia.
- iii. Ona o Keriso lo tatou Alii, ua fai ma faataitaiga sili mo le pule; e le o le lima uamea, ao tagata ia manuia ma faaolaina.

Faatoese i le Atua:

- i. Pe a faailoga tagata la tatou vaai, ina ua faatauvaai la tatou vaai atu i tagata ona o mea ua tatou maua.
- ii. Ina ua faia faamasinoga le tonu i lo tatou va ma isi, ona o le malosi faalemafaufau ma le iloa ua taotaomia ai lagona o nisi.
- iii. Ia faamagaloina lo tatou faafiamalolosi ua avea ma ala ua tatou sese ai, ona o le ola faaviivii mai o tagata ia i tatou.

Tatou tatalo i le Atua:

- i. Ia faatamaoigaina i tatou i le alofa, e tali atu i fesoasoani tatau ia i latou o moomia la tatou feasoasoani.
- ii. Ia saunia lo tatou malosi e tetee atu ai i faaososoga ma mea leaga, e lu'iina o tatou ola i soo se nofoaga tatou te i ai.
- iii. Ia avea lo tatou malosi ma auupega lelei e tau ai le taua faaleagaga, ina ia usitai atu tagata i lona finagalo alofa.

Me 14 - 20, 2017
Tusi Faitau: Salamo 51: 10-14

f. 10 "Le Atua e, ia e faia se loto mama mo a'u; ma ia faafouina se loto mau i totonu ia te au."

Autu: Faasaga i le Atua ma le loto atoa.

Faafetai i le Atua:

- i. Aua ua avea meaalofa o lona Malo, ma manuia mo le tagata ua tuuina atu lona ola atoa e faia ai lona finagalo.

- ii. Ina ua faailoa mai ia i tatou manuia atalī, e ala i lona alofa tunoa; faatasi ma le afio mai o Keriso i le lalolagi.
- iii. I le sao taua o tina ua aumaia ai le ola i le lalolagi, aemaise o meaalofa ua faatamaoai ai aua aiga, Malo, ma le Ekalesia.

Faatoese i le Atua:

- i. Ia faamagaloina lima ma vae gagase gofie i le faia o lona finagalo, faatasi ma o tatou loto le mautonu ma tosina gofie i le matagofie o le lalolagi ma faiga pototo a le tiapolo.
- ii. Ona o le faatauaina e nisi tina o latou tiute, ua le tonu o latou ala ma avea ma faataitaiga le tonu i fanau ma aiga, aemaise faalapotopotoga ua auuuna ai.
- iii. Ia faamagalo mai tamā o loo faaalua le lima uamea i le va ma tina, ina ua tautala tina i mea sa'o o loo tutupu i totonu o lona siosiomaga, i aiga, nuu, galuega, Malo ma le galuega a le Atua.

Tatou tatalo i le Atua:

- i. Ia alofa mai i tinā ma o latou tofiga, ia fesoasoani i lo latou taumafai e faasaga atu ia te Ia e manuia ai.
- ii. Ia fesoasoani mai lona Agaga i le va faamatua, ia iloa e le tinā ma le tamā le taua o le fetausia'i, ia taitaiina fanau i le finagalo o le Atua.
- iii. Ia tausia aiga i le matagofie o le Alii, ia iloa ma tumau i taitaiga mana a le Agaga Paia; ia faalologo atu i lona mafuta mai.

Me 21 - 27, 2017
Tusi Faitau: i Timoteo 6: 17-19

f. 17 “Ia e matua fai atu i e mauoa i lenei olaga, aua ne’i faamaualuluga i latou, aua nei faamoemoe i le oa e faaletumau, a o le Atua soifua, o loo foai tele mai mea uma lava e faafiafia ai.”

Autu: Ia iloa le Atua i lou oa

Faafetai i le Atua:

- i. Ona o ana foai e tele ua tausia ai le ola ma avea ma manuia mo le tagata.
- ii. Ona o manuia tumau o le lagi, ua faaali manino mai i ana Afioga Paia. Ua atoatoa le faaali mai ia Iesu lo tatou Alii Faaola
- iii. Ona o le faaolataga ua laveaiina ai tagata uma, ma le avanoa mo e le faatuatua ia a’oa’oina i le faatuatua ma laveaiina ai.

Faatoese i le Atua:

- i. Ona o le faasili i o tatou manatu o le tamaoaiga o le lalolagi, ua avea ma ala e galo ai e a le Atua mea uma ua tatou ola ai.
- ii. Ia faamagalo mai lo tatou lima mau i taimi e faia ai taulaga mo le galuega a le Atua.
- iii. Ona o le pulea e le tuinanau i le oa o tatou manatu, ua le iloa ai le mafatia o e matitiva ma lima vaivai i aiga.

Tatou tatalo i le Atua:

- i. Ia alofa mai i taimi tatou te matitiva ai faaleagaga i faaiuga tatou te faia mo auunaga eseese.
- ii. Ia fesoasoani mai i o tatou aiga, ia taitaiina e lona mana matai ma tagata o aiga i faiva o le tautua faamaoni.
- iii. Ia sisila alofa i taulaga ua tuuina atu e lana fanau i soo se ala ua latou tautuaina ai lona finagalo, ma faamanuia i ai.

IUNI

Me 28 - Iuni 03, 2017
Tusi Faitau: Eperu 13:12-16

f. 16 “ Aua nei galo ia te outou ona agalelei ma alolofa atu, auā o taulaga faapena e fiafia ai le Atua.”

Autu: Ia paia taulaga e faia i le Atua

Faafetai i le Atua:

- i. Ona o le faataitaiga lelei ua faia e Keriso i lona soifua, ua fai ma taulaga o lo tatou faaolaina.
- ii. I lona faamalosi mai e ala i le Agaga Paia, e taitai tonu i tatou i mea e ao ona tatou faia e tusa ma lona finagalo paia.
- iii. Ona o tu ma aga matagofie o le talalelei ua faatonuina ai a tatou aganuu, ma faaolaolaina ai pea le taua o le fetausia'i.

Faatoese i le Atua:

- i. Ona o le loto le faamaoni ua faatinoina ai le ola tautua, aua ua tatou faia e faamalieina ai o tatou tulaga ma le vaavaai mai o tagata.
- ii. Ona ua tatou faamuamua ia i tatou, ae to i le iu le faasoa mo taulaga e faia i le Atua.
- iii. Aua ua lilo pea i la tatou vaai le Atua i le ola o ē mafatia ma moomia la tatou fesoasoani.

Tatou tatalo i le Atua:

- i. Ia ola pea le soifua faitaulaga o Keriso i o tatou ola auauna mo le Atua e ala i le Ekalesia, aiga, nuu ma le atunuu.
- ii. Ia faailoa mai ia i tatou ala manuia e tautua ai le Ekalesia ma manuia ai aiga, nuu ma atunuu, ma lē mamao ese ai ma lona finagalo.

- iii. Ia manuia a tatou fanau, ma paia lo latou ola faaaogaina mo le Atua i so’o se ala ua faaaoga ai.

Iuni 4 - 10, 2017
Tusi Faitau: Faataoto 3:5-10

f. 5 “Ia e faatuatua i le Alii ma lou loto atoa, ae aua le faalagolago i lou lava atamai.”

Autu: Ia faafouina lau auaunaga mo le Atua

Faafetai i le Atua:

- i. Ona o lana meaalofa o le atamai ua tuuina i le fanau ao feagai ai ma le taumafai i aoga.
- ii. Ona o manuia ua maua i faatonuga aoga a ana Afioga paia, ua taitai ai ola o matua ma fanau e faia lona finagalo.
- iii. Ona o le malosi o loo foai mai tatou te auauna atu ai i Aso uma, ma faataunuu lo tatou valaauina i mea tatou te fai.

Faatoese i le Atua:

- i. I lo tatou gutuā ma le lē faamaoni i galuega o lona Malo, ua tatou faavaivai ai foi nisi o le aufaigaluega i amioga tatou te fai.
- ii. Aua ua faafiapopoto i tatou i o tatou manatu, a ua le iloa ona faalagolago atu i le musumusuga a le Agaga Paia.
- iii. Ona ua fai le ava ma fualaa faasaina ma vai su i nisi, ua le iloa foi le Atua ina ua aafia le mafaufau i ia mea.

Tatou tatalo i le Atua:

- i. Ia iloa atu le Atua, i taimi tatou te auaunaina ai lona finagalo i soo se ala o lo tatou valaauina.
- ii. Ia faamanuia ia tatou fanau ua faaiuina le taumafai, ma i latou ua filifili e tautua i vaega au a le Malo; ia fou pea le malosi e tautua atu

- ai i le Atua i ia faiva. Fesoasoani foi i fanau o loo le mautonu pea i le lumanai.
- iii. Ia alofa mai i le soifua tautua o tagata o le Ekalesia; ia foi le malosi, faamaoni ma le manuia e tusa o a latou auaunaga.

Iuni 11 - 17, 2017
Tusi Faitau: 2 Korinito 9: 5-15

f. 8 “E mafai foi e le Atua ona faafaulai ia te outou o mea alofa uma.....”

Autu: O le Atua e foi tele mai

Faafetai i le Atua:

- i. Ona o ana meaalofa e tele ua faasoa mai mo i tatou i Aso uma ua tatou fiafia ai.
- ii. Ona o manuia o le eleele, gataifale, ma le ea ua tatou maua ai le ola fou i taimi uma.
- iii. Aua ua tamaoaiga i tatou i le tino ma le agaga, ona o le togiaola na faia e Iesu lo tatou Faaola.

Faatoese i le Atua:

- i. Ina ua tatou le iloa ona faaoga tatau ana meaalofa ua foi mai, ua tatou manatu faapito foi i manuia ua tatou maua.
- ii. Ona ua tatou faatamaia pea le eleele ma le gataifale, faapea ma le ea i kasa oona ua gaosia e le tagata.
- iii. Ina ua foi tele mai le Atua i lo tatou ola, ae ua tatou le iloa ona faafoi atu lea alofa e tautua ai lana galuega.

Tatou tatalo i le Atua:

- i. Ia manuia atunuu o loo mafatia i mafui’e ma lologa, o afā ma faama’i eseese ua aafia ai.
- ii. Ia alofa i sailiiliga a le tagata i vailaau e fesoasoani ai i ma’i eseese ua aafia ai le lalolagi, ae maise i le kanesa ma faama’iote.
- iii. Ia faamanuia i galuega alofa ua taumafai i ai mo le siosiomaga. Ia manuia le eleele,

gataifale ma le ea; ia laveai i atunuu ua aafia i mafatiag o suiaga o le tau.

Iuni 18 - 24, 2017
Tusi Faitau: Salamo 50: 7-15

f. 14 “O le viiga, ia fai lea ma taulaga i le Atua, ia e avatu foi i le Silisiliese mea na e tauto ai.”

Autu: Ia auauna ma le loto e mama

Faafetai i le Atua:

- i. I ala o lona alofa ua uma ona faatinoina i le soifua paia o Iesu Keriso, ua aumaia ai le faaolataga.
- ii. Ona o faatonuga o le ola auauna ma le soifua tautua o Aso uma, ua tuuina i lana Afioga Paia tatou te mulimuli ai.
- iii. Ona o lo tatou laveaiina i lona mana alofa, e ui ina galulue mo le ola fia tauia; ae ua le faapea lona alofa mai

Faatoese i le Atua:

- i. I lo tatou ola fia pule i mea ua ia foai mai mo i tatou, ua tatou le iloa foi le Atua o le malosi uma.
- ii. Ina ua faamaualuluga o tatou loto i mea ua tatou faia mo le Atua, ua ta'uvaleina lona alofa i le ola faafiamalosi.
- iii. Ona o taulaga ua avatu e le tagata, ina ua tatou to i le 'iu inati mo le Atua; ai ana faasoia ua tele mo i tatou.

Tatou tatalo i le Atua:

- i. Ia a'oa'o mai lona Agaga ia tatou iloa ona auauna ia te Ia ma le faamaoni.
- ii. Ia faamanuia mai i magavai eseese ua aumaia ai fesoasoani mo e mafatia, i Malo, faalapopotoga, Ekalesia ma tagata uma.

- iii. Ia faamanuia i malo au faatasi o loo naunau ia manuia atunuu o mafatia, ma Malo tetele ua faalagolago i ai foai mo le faia o ia fesoasoani.

IULAI

Iuni 25 - Iulai 01, 2017
Tusi Faitau: Salamo 9: 7-12

f. 10 “E faatuatua ia te oe o e ua iloa lou suafa; aua, le Alii e, e te le tuuna i latou o e saili ia te oe”.

Autu: E manuia le tagata e faatuatua i le Atua.

Faafetai i le Atua:

- i. Aua ua fesoasoani mai ao tatou tu’itu’i atu mo fanau i le feagai ma aoga, ua faapea foi ia tatou galuega.
- ii. Ina ua fai lana amiotonu ma sulufaiga o e o mafatia ona o le pule sau a nisi, ina ua ia saunia lava ala manuia mo e faatuatua uma.
- iii. Ona o manuia ua saunia mo le tagata o Aso taitasi, ua foai tatau mai foi mo o tatou ola i mea ua tatou ole atu ai.

Faatoese i le Atua:

- i. Ia faamagalo mai le le faatuatua pe a o tatou feagai ma faafitauli ma mafatiaga o le ola.
- ii. Ina ua tatou iloa le mea lelei e fai, ae ua tatou le faia ona o le faapaie ma le faatalatalanoa i o tatou manatu.
- iii. Ia faamagalo mai o tatou loto fia tau i ma sui, aua ua pulea e le ita ma tuinanau o tatou loto.

Tatou tatalo i le Atua:

- i. Ia foai mai le loto matala e talia ai lona faaali mai i le soifua o isi tagata ua fai ma o tatou fili.

- ii. Ia tatou iloa lana amiotonu, ia le fefe ai e faia le faaiuga faigata ma le tonu i mea o afaina ai le ola o ona tagata.
- iii. Ia faamanuia mai i lana Ekalesia, ia mana pea le upu folafola atu; ia faatuatua tagata i lona suafa ma manuia ai.

Iulai 2 - 8, 2017
Tusi Faitau: Mareko: 9: 33-35

f. 35ⁱ “Afai e fia muamua se tasi, ia avea o ia ma mulimuli i tagata uma, ma auauna a tagata uma.”

Autu: Ia faale-Atua le agaga o auaunaga.

Faafetai i le Atua:

- i. Ona o lo tatou valaauina mo ana feau, ua mafai ona tatou maua ai manuia o lona alofa tunoa.
- ii. Aua ua avea lava le liutino tagata o lana Afio ia Iesu, ua tatou iloa ai le uiga o le ola auauna.
- iii. I tofi o le auauna, ua fai ma mea e fiafia ai le so’o ua valaauina e faailoa atu lona finagalo alofa i tagata.

Faatoese i le Atua:

- i. Ina ua avea i tatou ma auauna fia sili i le va ma tagata, aemaise tiute ua tatou faia mo le manuia o nisi.
- ii. Ona ua tatou le tumau i le fai ma auauna, ona ua tatou faamuamua i o tatou tulaga ma le vaavaai mai o tagata.
- iii. Ia faamagaloina le auauna i taimi e pau atu ai i faaososoga, ma manumalo ai le tiapolo i faaiuga sese tatou te faia.

Tatou tatalo i le Atua:

- i. Ia tatou maua pea le loto o le auauna valaauina a le Matai o le galuega i tiute tatou te faia.

- ii. Ia tumau mai lona Agaga e faatonutonu i faaiuga tatou te faia, e aafia ai le saolotoga ma le saogalemu o ola o tagata.
- iii. Ia avea o tatou tupulaga ma fanau e fiafia e auauna atu i le Atua i lo latou malosi.

Iulai 9 - 15, 2017
Tusi Faitau: Kolose 3: 12-17

f. 15 “Ia pule foi le filemu mai ia Keriso i o matou loto, o le mea lea ua valaauina ai outou e fai ma tino e tasi; ma ia outou saga faafetai.”

Autu: Loto atu i galuega lelei ma filifili faatasi ma le Atua

Faafetai i le Atua:

- i. Ona o le sao taua o ana auauna ua faailoa mai le talalelei, i le faasolo mai o augatupulaga ua oo mai foi i o tatou Aso.
- ii. I galuega lilo a le Agaga Paia, ua aumaia ai ia i tatou le loto fiafia e filifili i le mea lelei ma aoga e fesoasoani atu ai i e mafatia.
- iii. Ona o lu’i o loo faatulai mai i ana Afioga Paia, e lagaina ai manatu aoga mo le faia o mea lelei i tiute ua tatou auauna ai.

Faatoese i le Atua:

- i. Ona o le faaletino o mea ua tatou filifili e faamuamua, a ua faatuatuanai i lona finagalo paia.
- ii. Ona o mea leaga ua tatou faia e faaleagaina ai isi tagata ae ua le moni, ona o lo tatou ola fia viia i e o matamata mai.
- iii. Ona ua tatou tuua a’oa’oga lelei ua uma ona tuuina mai tatou te mulimuli ai, ma tuua’i leaga i e o taumafai i mea lelei.

Tatou tatalo i le Atua:

- i. Ia maua le loto maualalo e filifili ai faatasi ma lana Afio, ia tumau ai pea manuia o le Atua i o tatou aiga.
- ii. Alofaina taitai o Malo ma aiga, ia faaali ia i latou lona alofa le faatuaioia e faia ai faaiuga.
- iii. Ia taitai mai i lana galuega, ia tatou maua manatu aoga e atia'e ai lana galuega ma faia lona finagalo i lo tatou ola.

Iulai 16 - 22, 2017
Tusi Faitau: Iakopo 2: 8-13

f. 12 "Ia faapea ona outou tautala, ia faapea foi ona outou faia, pei o e a faamasinoina i le tulafono o le sa'olotoga."

Autu: Fiafia e feagai ma lu'i fou i lou olaga.

Faafetai i le Atua:

- i. Aua ua faamanatu mai e lu'itau o lo tatou ola, le Atua e soifua pea ma latalata mai ia i tatou.
- ii. I le fou o lona faaali mai i taimi uma, i ona lava ala tatau ua ia filifilia e a'oa'o mai ai le tagata i lona filemu.
- iii. Ona o le saolotoga moni ua faasaoloto mai ai Keriso mo i tatou ai le agasala e fano ai.

Faatoese i le Atua:

- i. Ona ua o eseese lo tatou faailoa atu o lona finagalo, ma lo tatou olaina i Aso taitasi.
- ii. Aua ua le mafai ona tatou nonofo lelei ma o tatou tuaoi, ona o le faamaualuga o o tatou loto.
- iii. Ina ua fai i tatou ma ala a Satani e tumau ai pea i mea tuai, ae teena le faaali mai o lona Agaga i mea fou e le masani ai.

Tatou tatalo i le Atua:

- i. Ia fesoasoani mai ia i tatou e o ese mai mea tuai ua masani ai, ae tatala atu faitotoa o o tatou loto i faaaliga fou o lona Agaga Paia.
- ii. Ia avea i tatou ma ona mana e fou ai ola o ona tagata, i le talaiga o le finagalo o le Atua.
- iii. Ia foai mai le potō e fetuutuunai ma fetāla'i ai o tatou manatu, aua mea aoga e manuia ai tagata uma ma le finagalo o le Atua.

Iulai 23 - 29, 2017
Tusi Faitau: i Ioane 2: 1-6

f. 5 “A o le tausī i lana afioga, e moni, ua atoatoa le alofa i le Atua i totonu ia te ia. O le mea lea ua tatou iloa ai o i totonu ia te Ia i tatou.”

Autu: O faatusa paia i tatou o le Atua.

Faafetai i le Atua:

- i. Ona o lo tatou faamagaloina mai agasala ua tatou faia, ma amioga ua tatou sese ai.
- ii. I avanoa e maua pea e le tagata i le faaolataga, e ala i le fesoasoani o le au uso i totonu o lona tino i le lalolagi, le Ekalesia.
- iii. Ina ua fai ana Afioga ma upu ola, ao se faamanatu aoga mo le tagata faatuatua o lo’o soifua le Atua i le ola o le tagata.

Faatoese i le Atua:

- i. Ona o le popole vale o tatou loto pe a vesia le olaga i mea tutupu, ma le iloa ona fesili atu i le taitaiga a le Atua.
- ii. Ina ua tatou fiafia e tautala i le fealofani, ae ua le mafai ona faatinoina i o tatou olaga.
- iii. Ona ua tatou soli pea ana tulafono, ma lē manatua lona ‘auai mai ia i tatou ona o le leotele o tatou tuinanau.

Tatou tatalo i le Atua:

- i. Ia a’oa’oina i tatou i ona ala, ma faatonu mai i mea tatou te faia e manuia ai.
- ii. Ia faamalamalama mai ana Afioga Paia ma ia tupu i totonu ia i tatou, e fai ma manuia mo nisi e le iloa le Atua.
- iii. Ia alofa i le galuega talai ma faamafanafanaga a le Ekalesia, ia faamalosia kerisiano i le faia o mea lelei tusa lava poo le a le tau.

AUKUSO

Iulai 30 - Aukuso 05, 2017
Tusi Faitau: Kalatia 5: 13-15

f. 13 “Aua le au uso e, ua valaauina outou i le sa’olotoga; tau lava ina ne’i avea le sa’olotoga ma avanoa mo le tino; a ia outou auauna le tasi i le tasi i le alofa.”

Autu: O le alofa le tulafono sili.

Faafetai i le Atua:

- i. Ona o lana Ekalesia ua fai ma moli mu tele o lona alofa, ua susulu atu i le lalolagi pogisa ma faamalamalamaina ai.
- ii. I le saolotoga ua faasoloto mai ai i tatou, ua avea ma avanoa lelei e faatinoina ai le alofa atu, ma le feagaleleia’i o lana fanau.
- iii. Ona o le soifua ositaulaga o Iesu lo tatou Faaola, ua fai ma faamoemoe lelei mo ola ua tuuina atu i lana taitaiga paia.

Faatoese i le Atua:

- i. Ina ua tatou le mulimuli atu i lana faataitaiga sili, o le alofa atu faapei ona tatou alolofa ia i tatou lava.

- ii. Ina ua fai lo tatou saolotoga ma ala e taotaomia ai lagona ma manatu aoga o nisi o lana fanau o fia aoga mo Ia.
- iii. Ona ua pispisia lana Ekalesia paia i faiga faapolokiki, ma le maua ai se toamalie o ona tagata faatuatua.

Tatou tatalo i le Atua:

- i. Ia faasaoloto mai lana Ekalesia mai uiga mataga o le lalolagi, ia tumau i le faasolotoina o tagata i le talalelei ia Iesu.
- ii. Ia pai atu le galuega faamafanafana a le Ekalesia i tagata puapuagaina ma avea ma ola fou i nofoaga mafatia.
- iii. Ia faasoa mai le tumu atoatoa e ala i le Agaga Paia, tatou te iloa tino ai ala manuia o lona alofa faavavau o Aso uma.

Aukuso 6 - 12, 2017

Tusi Faitau: II Samuelu 22: 26-34

f. 31 “O le Atua e sao lava lona ala; ua se ario ua te’a ma le otaota afioga a le Alii, o le talita o ia i e faatuatua uma lava ia te ia.”

Autu: Ia fiafia i le Atua e fou ai le malosi.

Faafetai i le Atua:

- i. Ona o lona faamaoni i le tagata i lana tausiga alofa i Aso uma, e ui o le tagata femoumoua’i.
- ii. I le sogalemu moni ua mautinoa mo le tagata faatuatua, faapei ona Ia laveai puapuaga o e ua sulufai atu faamaoni ia te Ia.
- iii. Ona o le malosi fou pea o Aso uma mo le tagata, e faatinoina ai ona tiute ma feau faapei ona valaauina ai.

Faatoese i le Atua:

- i. Ona o lo tatou le manatua o ona ala matagofie, pe a foliga manuia mea tatou te faia.

- ii. Ina ua punitia la tatou vaai ae i le Atua, ona o ala o Satani ua tatou ui ai ma pulea o tatou loto.
- iii. Ona ua saili i fualaau faasaina ma ava oona le malosi i nisi, ma iu atu ai i le faia o faaiuga mataga ua aafia ai le ola.

Tatou tatalo i le Atua:

- i. Ia laveai mai a tatou fanau ma i latou ua avea fualaau fasaina ma ava oona, e pulea lo latou malosi.
- ii. Ia fesoasoani mai i taitai o Malo, nuu ma atunuu ia latou iloa ala o le Atua e faia ai faaiuga manuia.
- iii. Ia faamanuia mai i le lalolagi ao taumafai i ala e foia ai faafitauli, ona o puapuaga faalenatura o feagai ai.

Aukuso 13 - 19, 2017

Tusi Faitau: Kalatia 6: 7-10

f. 9 “Aua ne’i tatou faapalapala i le amio lelei; aua o ona po e tatau ai tatou te selesele mai ai, pe afai tatou te le faavaivai.”

Autu: Ia le faatamala i le soifua finau mo le manuia.

Faafetai i le Atua:

- i. I ona manuia ua tele aua ua foai tatau mai mo i tatou i Aso taitasi.
- ii. Ona o ana foai ua ala eseese mai, ua fai ma manuia mo i tatou ao galulue ai i soo se ala o feau ua tofia ai tatou.
- iii. I lana Afioga Paia, ua molimau i le fetausia’i, ma ia fua faatatau foi o tatou ola i mea ua maua o Aso uma.

Faatoese i le Atua:

- i. Ona o tatou manao tuinanau ma loto le faamalieina, e mafua ai ona faia o agasala ma le iloa.
- ii. Ona o le soona fai o manuia ua ia foai mai, ua leai se vaai atu mo e o fia maua; ua leai se loto foai mo isi.
- iii. Ina ua faavaivai ma ola faatu'utu'u ma le faapaie le tagata, ua foliga mativa ai i mea e maua e tausi ai le ola.

Tatou tatalo i le Atua:

- i. Ia faamanuia mai i galuega ua tatou galulue ai, e tausia ai o tatou aiga ma auaunaina ai lona finagalo.
- ii. Ia manuia pisinisi ma falefaigaluega eseese ua fesoasoani i le tamaoaiga o le atunuu.
- iii. Ia le uma le loto finau i mea lelei, ma faamalieina i manuia ua maua e talai atu ai le Atua alofa, ua tatou manuia ai.

Aukuso 20 - 26, 2017
Tusi Faitau: Tito 3: 1-8

f. 8 "O le upu moni lena. Ou te loto foi ina ia e matua faamalosi atu i ia mea, ina ia naunau i latou o e ua faatuatua i le Atua ia faia galuega lelei; e lelei lava ia mea ma aoga i tagata."

Autu: Ia fai ma amepasa faamaoni o le talalelei.

Faafetai i le Atua:

- i. Ona o e ua avea ma taitai i nuu, aiga ma atunuu, ua fai ma e faamaopopo ma taulamua i mea e manuia ai.
- ii. Ona o Iesu ma galuega lelei o le faaolataga, ua avea ma faataitaiga lelei mo lana Ekalesia i le lalolagi.

- iii. Aua ua ia faaaoga mai o tatou tagata agasala e fai ma e auaunaina lona finagalo, mo le lalolagi.

Faatoese i le Atua,

- i. Ina ua tauvalea pea lana galuega paia i o tatou tiute faaamepasa, aua ua leai se onosai pe a fetaiai ma puapuaga.
- ii. Ina ua faafoliga mea tatou te faia i luma o tagata o e matamata mai, ae ua le faamaoni lo tatou olaina o ana Afioga.
- iii. Aua ua tauamiotonuina i tatou i lona alofa, ae ua tatou le iloa ona tumau ai i lana amiotonu.

Tatou tatalo i le Atua,

- i. Ia a'oa'o mai ia tatou iloa ona tauave faamaoni le mamalu o le Atua i o tatou olaga o Aso uma.
- ii. Ia avea i tatou ma amepasa faamaoni a le Alii, e iloa ona faalogo atu i lana taitaiga mana, i taimi e faia ai filifiliga lelei.
- iii. Ia avea le galuega faataitai i aiga, nuu ma atunuu, e maua ai le filemu ma to'a e mapu i ai e puapuagatia.

SETEMA

Aukuso 27 - Setema 02, 2017

Tusi Faitau: Isaia 61: 1-3

f. 3 “E avatu le fiafia i e faanoanoa i Siona, e foaiina atu ia i latou le matagofie e sui a’i le lefulefu, o le uu o le olioli e sui a’i le faanoanoa, o le ofu e fai a’i viiga e sui a’i le loto faavaivai; e igoa i latou, O laau o le amiotonu, o le faatoaga a le Alii, e fai mona viiga.”

Autu: O le Talalelei o le saolotoga.

Faafetai i le Atua:

- i. Ona o le talalelei o le faaolataga ua ao ai Samoa ma le lalolagi, ua maua ai e tagata le ola.
- ii. Ona o lona valaauina o i tatou e fai ma misionare o lana galuega talai, ia fai ma faifeau i soo se galuega tatou te galulue ai.
- iii. Ona o ulua’i misionare ma galuega taua a lana aufaigaluega na tala’i maia le talalelei, ua liliuina le pogisa i le malamalama.

Faatoese i le Atua:

- i. Ona ua faaletumau le tagata i le talalelei ina ua fealoalofa’i le ola ma avea ai le talalelei a Keriso ma mea mamafa i le olaga.
- ii. Ina ua fenumiai tagata ona o lotu eseese ua faatula’i e tagata, e saili ai o latou lava viiga, ae ua le maua ai se viiga o le Atua.
- iii. Ona ua le faamaoni kerisiano e tauave le talalelei a Keriso, aua ua afua ia i latou misa ma fevaevaeai, ua le maua ai le nofo lelei.

Tatou tatalo i le Atua:

- i. Ia alofagia le galuega Faamisionare i le lalolagi, sei leoleoina le aufaigaluega o

galulue ai ma o latou aiga; ia fua tele mai galuega a ana auauna.

- ii. Ia faamanuia ia i latou o feagai ma puapuaga, ia avea le Ekalesia ma misionare e lavea'i ma avatu le faamoemoe i tagata o mafatia.
- iii. Ia faasaoloto mai tatou i agasala, ma aumai le ola fou e fai ai mea lelei, ia faaalua pea le Atua ma le talalelei i a tatou galuega.

Setema 3 - 9, 2017

Tusi Faitau: Filipi 2: 4-11

f. 5 "Ia ia te outou foi lenei manatu o ia Keriso Iesu."

Autu: Ia loto maulalo

Faafetai i le Atua:

- i. Ona o uiga o le loto maulalo ua avea ai Keriso ma faataitaiga sili mo tagata.
- ii. Ona o manuia o le ola faaeaina o le loto maulalo, ua fai ma filemu moni i le va o tagata.
- iii. Ona o e ua tuuina atu mo le filemu o le lalolagi, e ala i galuega ua galulue ai i le Malo ma soaiete eseese ma le galuega Faamisionare.

Faatoese i le Atua:

- i. Pe afai e i ai taimi e le maua ai le to'a filemu o ona tagata, ina ua faamaualuluga o tatou manatu ma faalialiavale le pule.
- ii. Ona ua o eseese lo tatou faasoa atu o lona filemu mo le lalolagi ma mea tatou te faia, ua le maua ai sona viiga mai tagata.
- iii. Ona ua fe'ū taliga ma lē lagona e loto lona fetalai mai, aua ua leo tele mai uiga faamaualuluga ma le le fia toilalo i o tatou ola.

Tatou tatalo i le Atua:

- i. Ia foai mai loto malūlū e iloa lelei ai ana Afioga, ma maua ai le to'amalie i itu Aso vevesi ma le le mautonu o le tagata.
- ii. Ia liliuina le loto faamaualuga i le loto maulalo, ma le loto eleelea i le loto mamā, e tautua atu ai i lana Afio.
- iii. Ia alofa atu i e o fai i tatou ma fili, ia liliuina o latou loto e fai ma loto salamō ma fiafia i le nofo lelei, e faapei ona faataitai mai Iesu.

Setema 10 - 16, 2017
Tusi Faitau: 1 Ioane 1: 5-10

f. 9 “A e afai tatou te ta’u atu a tatou agasala, e faamaoni o ia, ma le amiotonu e faamagalo ai a tatou agasala, ma faamama mai ia i tatou i amioletonu uma lava.”

Autu: Salamō ma agai pea i luma.

Faafetai i le Atua:

- i. Auā ua faamaoni lava o Ia e faamagaloina i tatou ai agasala e tele ua tatou faia.
- ii. Ona o le onosai ma avanoa e tele ua Ia tuuina mai ia i tatou, e salamō ai ma toe liliu atu ai o tatou ala leaga.
- iii. Aua ua Ia faamalamalama mai le lumanai manuia o le tagata faatuatua, o le ua faamaoni ma usitai atu i ana afioga.

Faatoese i le Atua:

- i. Ona ua le tumau i tatou i le faamaoni i tautinoga o le salamō, ina ua faafia popoto i tatou i manatu.
- ii. Ia famagalo mai lo tatou ola faafiaamiotonu, e ui tatou te iloa mea ua sese ai i tatou i lo tatou va ma e ua tatou tau agasalaina.
- iii. Ia faamagalo mai le ola le faamagalo atu ma le tau ma sui, ua le maua ai le agai atu i le lumanai manuia ma le loto salamō.

Tatou tatalo i le Atua:

- i. Ia fesoasoani mai i taimi e faaosoosoina ai i tatou ma faavaivai ai o tatou loto, ia apo atu i tatou i lona alofa tunoa.
- ii. Ia faamanuia ia Samoa ma ona tagata, ia faatupuina le salamō ma le faatuatua i le Atua e manuia ai.
- iii. Ia loto atu le lalolagi i lana amiotonu e taitaiina ai Malo ma tagata-a-nuu, e manuia ai le agai atu i le lumanai.

Setema 17 - 23, 2017

Tusi Faitau: 1 Samuelu 16: 4-7

f. 7 “A ua fetalai mai le Alii ia Samuelu, Aua e te vaai i lona tino, po o le maualuga o lona tino, auā ua ou tetee ia te ia; auā e le vaai le Alii pei o le vaai o tagata, auā e vaai tagata i le tino, a e vaai le Alii i le loto.”

Autu: Saunia o tatou loto mo le Alii ma ana feau.

Faafetai i le Atua:

- i. Ona ua avea le loto o le tagata agasala ma nofoaga e fesoatai mai ai ia i tatou.
- ii. Aua ua faasino mai mo le tagata ala o ana filifiliga, ua valaauina ma faaaogaina ai tatou mo lona finagalo.
- iii. I lona mafuta mai i feau ma galuega sa o tatou feagai ai i le vaiaso. Ua faapea foi fanau i aoga, ma matua matutua i aiga.

Faatoese i le Atua:

- i. Ona o a tatou filifiliga faia i le vaaiga faatagata, ae le o lea lona finagalo.
- ii. Ona e tele ina pulea e le faaituau a tatou filifiliga, ma o tatou loto le mama ia i latou ua tauaveina tofiga, ae faagalogalo i le musumusuga a le Agaga Paia.

- iii. Ia faamagalō mai ina ua le maua le lototele e filifili ai le mea sa'o, ae ua avea le tamaoaiga e filifili ai e faia le amio sese.

Tatou tatalo i le Atua:

- i. Ia foai mai mata ma taliga, ae sili i o tatou loto e faalologo ai ma iloa le mea e ao ona faia mo le manuia o aiga, nuu, atunuu ma le lana galuega ua tatou galulue ai.
- ii. Ia maua e le ofisa o faamasinoga ma alii faamasino le loto faamaoni e faataunuuina ai lana amiotonu i le faatinoina o ona faiva.
- iii. Ia alofaina i latou ua avea faamalosi lo latou saolotoga mai a latou mea totino, ma saisaitia i le olaga ona o faaiuga amioletonu ua faia e nisi faamasino, po'o e faia faaiuga i a latou matupu na tuuina atu i faamasinoga.

Setema 24 - 30, 2017

Tusi Faitau: Galuega 12: 20-24

f. 24 “ A ua tupu le afioga a le Atua ma ua faateleina.”

Autu: Ia le faatamala i tofiga ma fao i viiga o le Atua, ina ua manuia.

Faafetai i le Atua:

- i. Aua ua tele lava manuia ua maua e le tagata i ala eseese ua ia foai mai ai i o tatou ola.
- ii. I o tatou atunuu ua avea ma nofoaga lelei tatou te nonofo saoloto ai, ma faatino lona finagalo i le lalolagi.
- iii. Ona o tatou aiga ma manuia ua faamanuia mai ai ia tatou fanau, i o tatou fanua ma gataifale faapea galuega ua galulue ai, aemaise tofiga ua faaaogaina ai o tatou ola.

Faatoese i le Atua:

- i. Ona o manuia ua tatou maua, ua tatou le iloa ona faaaoga ma le faaeteete ae ua soonafai ina ua tele.
- ii. Ina ua le mafai ona tufa ma faasoa atu manuia o le Atua ia manuia ai nisi ma faatuatua ia te Ia, ona o lo tatou tuinanau.
- iii. Pe afai ua avea o tatou aiga ma nofoaga e le maua i ai le toafilemu o le Atua, ona o vevesi ma feeseeseaiga i o tatou manatu.

Tatou tatalo i le Atua:

- i. Ia le uma ona manuia e faamanuia mai ai i lo tatou atunuu i ana faigamalo, nuu, ma aiga.
- ii. Ia tumau i lana Ekalesia lona alofa tunoa e talaiina ai lana faaolataga, ma fai ma manuia mo tagata o le lalolagi.
- iii. Ia le uma ana tofiga i fanau a le Ekalesia e faia lona finagalo, ma tali atu i lana valaau alofa o le talalelei.

OKETOPA

Oketopa 1 - 7, 2017
Tusi Faitau: Faataoto 2: 1-9

f. 9 “Ona e lagona ai lea o le amiotomu, ma le faamasinoga ma le amio sa’o; o ala lelei uma lava.”

Autu: O le tamaitiiti ua i ai le poto, e iloa ala o le Atua.

Faafetai i le Atua:

- i. Ona o ana Afioga Paia e a’oa’o mai i tupulaga uma, ma le poto ua faailoa mai ai ala lelei o le Atua.
- ii. Ona o lona alofa i tamaiti, ua manuia ai tamaiti uma ua usitai atu i ana taitaiga alofa.

- iii. Ona o taleni ua tamaoaiga ai olaga o fanau, ua fai ma manuia mo aiga ma nuu, atunuu ma Malo, faapea lana Ekalesia.

Faatoese i le Atua:

- i. Ona ua sese pea a tatou tupulaga i meaalofa o le atamai, ua manatu faasausili ai i matua ma e matutua ona o le fou o le iloa.
- ii. Ona o ala o nisi fanau ua le iloa i fualaau faasaina ma ava oona, ua le mautonu ai i le va tapuia i sootaga faatagata ola.
- iii. Ia faamagaloina fanau ua i falepuipui faatasi ma i latou ua tausalaina i le tulafono, ina ua malo le tiapolo ia latou filifiliga.

Tatou tatalo i le Atua:

- i. Ia maua e fanau le poto moni mai le Atua, e taitaiina ai lo latou lumanai i le amiotonu.
- ii. Ia lavea'iina fanau i falepuipui ona o faasalaga ua feagai, ia fuataiina o latou ola ma liliu atu ia te Ia ma lona poto e manuia ai.
- iii. Ia faasoa mai pea lona tumu i le Malo ma le Ekalesia, e saunia ai polokalama aogā e tapena ai fanau ma lo latou lumanai.

Oketopa 8 - 14, 2017

Tusi Faitau: Teuterome 4: 27-31

f. 29 “A e afai tou te toe saili i le Alii lou Atua i lea mea, ona e maua lea o Ia, pe afai e te saili ia te Ia ma lou loto atoa ma lou agaga atoa.”

Autu: Amio pulea e taunuu ai le manumalo.

Faafetai i le Atua:

- i. Ua maua lenei Aso Sa faapitoa e folafola ai e fanau ana Afioga Paia, ua fai ma faamanatu mo matua ia ta'ita'i le fanau i ona ala paia.
- ii. Ona o le sao o Faiaoga Aso Sa ma ana Auauna, i tala, tauloto ma pesega ua faamatalaina ai lona alofa i le faalogo a tagata.

- iii. Aua e ui lava ina nonofo fanau a Samoa i atunuu ese, ua saili atu foi i le Atua i ia nofoaga, ua ia faafofogaina foi ma faamanuia ia i latou; ua faapea foi i le atunuu.

Faatoese i le Atua:

- i. Ona o le tele o fanau a Samoa i atunuu mamao ma Samoa ua le fiafia i lotu ma tapuaiga i le Atua.
- ii. Ona ua faavaitaimi le alofa i le Atua, ua tauvalea foi le tapuaiga i le Alii ma le Ekalesia ona o le amiolepulea o e ua auauna i le Ekalesia.
- iii. Ona ua faatoa saili le tagata i le Atua pe a feagai ma puapuaga, ae ua faagalologo i taimi e taugalemu ai le olaga.

Tatou tatalo i le Atua:

- i. Ia avea le molimau a fanau o lenei Aso Sa Faapitoa e liliuina ai loto o e faalogologo i ai ma saili atu ai i lona Malo alofa.
- ii. Ia sili ona olaina e fanau lona finagalo ma pulea ai mea latou te faia, e taunuu atu ai i ona ala manumalo.
- iii. Ia manuia le aufaigaluega ma faiaoga Aso Sa, ia saunia pea e faamatala lona alofa mo le Ekalesia a fanau; ia fafaguina foi matua i la latou pito laau, o le fiafia e ave fanau i aoga Aso Sa.

Oketopa 15 - 21, 2017
Tusi Faitau: Salamo 18: 20-24

*f. 20 “Ua tauia mai a’u e le Alii e tusa ma la’u
amiotonu; ua tauia mai e Ia ia te au e tusa ma o’u
lima mama.”*

Autu: Savali i le amio sa’o.

Faafetai i le Atua:

- i. Ona o lana amiotonu ua manuia ai le tagata faatuatua i ona laasaga o ola ai.
- ii. Aua ua avea le soifua le ponā o Keriso ma faaolataga mo le tagata agasala, ua maua ai le avanoa i le ola faavavau.
- iii. Ona o le faamaoni o ana folafolaga mo i tatou, ua fai ma faamoemoe fou o le tagata faatuatua e ui e mafatia i le olaga; ae faatalitali atu ma le onosai i le fesoasoani mai o le Atua.

Faatoese i le Atua:

- i. Ona ua tatou naunau e faia le mea lelei, peitai ua tatou fai lava le mea leaga.
- ii. Ona ua sese ala tatou te ui ai ina ua fitā mea tatou te fetaiā’i, ua popole vale foi o tatou loto ma sulu solo e aunoa ma le manatua o le Atua.
- iii. Ia faamagalo mai i tatou i ala alo ma ala le lelei ua tatou ui ai ma le mautinoa, ma tuua’i i isi le leaga o taunuuga.

Tatou tatalo i le Atua:

- i. Ia faasino mai e ala i le Agaga Paia ala o le manuia tatou te auauna atu ai ma faia lona finagalo.
- ii. Ia taitai mai lo tatou atunuu i ala manuia ma laulelei e maua i le amiotonu ma le faamaoni, e galulue ai e auauna atu i tagata ma le Alii.
- iii. Ia tumau fanau i ala o le Alii ua uma ona a’oa’oina ai, ma ala matagofie o le Atua ia fua mai i o latou olaga o Aso uma.

Oketopa 22 - 28, 2017
Tusi Faitau: Faataoto 28: 22-28

*f.25 “O le ua fefete lona loto, na te faatupuina le
misa; a o lē faatuatua i le Alii, e matua ma’ona
lava ia.”*

Autu: Ia aloalo ese i le faatupu o maseiga.

Faafetai i le Atua:

- i. Ona o lapataiga aoga ua tatou maua mai i ana Afioga poto, ua avea ma tapasa e taitaiina o tatou ola.
- ii. Ona ua Ia vaoia misa ma fevaevaeaiga i le va o nuu ma atunuu, aiga ma tagata, e ala i taitai ma i latou o faatupuina le filemu.
- iii. Ona o Iesu ma faataitaiga lelei o le alofa, ia le agaleaga atu faatasi ma le le tau ma sui, ua fai ma faataitaiga o le nofo lelei.

Faatoese i le Atua:

- i. Ona o lo tatou iloa o le mea lelei e tataua ona fai a ua tatou le faia, ona ua pulea e le tiapolo o tatou manatu.
- ii. Ona o le faamaualuluga ma le losilosu o o tatou manao, faatasi ma le manatu faapito e tutupu ai maseiga i le va fesootai faatagata.
- iii. Ona ua tele ina tatou vaai ifo i o tatou lelei, ma tuua’i leaga i isi ua le maua ai se toafilemu i totonu o aiga, nuu ma atunuu.

Tatou tatalo i le Atua:

- i. Ia faailoa mai ia i tatou le galuega mana a le Agaga Paia, e mafai ona tausia ai le filemu i aiga, nuu ma atunuu.
- ii. Ia sili pea ona avea le Ekalesia ma ala o le filemu mo le lalolagi ma nofoaga o i ai le fevataua’i ma misa, ia nofo fealofani tagata.
- iii. Ia tatou maua le fetausia’i ma le feagalelea’i, ia naunau i le loto faamagalalo ma iloa atu le Atua ma ana meaalofa i olaga o isi.

NOVEMA

Oketopa 29 - Novema 04, 2017
Tusi Faitau: Salamo 105: 1-6

*f. 4 “Sailiili ia outou i le Alii ma lona malosi;
sailiili i ona fofoga, aua le aunoa.”*

Autu: Saili le Atua ma le loto atoa.

Faafetai i le Atua:

- i. Aua ua taunuu manuia sailiga a le tagata faatuatua, ua manuia ai ona faamoemoega o lena foi vaiaso.
- ii. Aua ua le tuulafoai mai i taimi na le taugamalie ai o tatou olaga i mea e tutupu, ua faapea foi i taimi ua tatou moomia ai lana fesoasoani.
- iii. Ona o le matagofie o ana foafoaga ma mea ua ia saunia, mo le tausiga o lo tatou ola o Aso uma.

Faatoese i le Atua:

- i. Ona ua le atoatoa o tatou loto e saili atu ai, aua faatoa manatua le Alii i taimi mafatia; ae ua galo i taimi o le solo lelei.
- ii. Ia faamagalo mai a tatou agasala ua tele, aua ua tatou le iloa tauave o tatou tiute o le faailoa atu o le Atua ma lona alofa ia ola ai nisi
- iii. Ona ua faasoesa lo tatou valaau atu ia te Ia i mea ua tatou mananao ai, ae ua itiiti i le ola faafetai ma faamalieina i mea ua foai mai.

Tatou tatalo i le Atua:

- i. Ia aveesea le olaga faafoliga, ma le fia malosi ia i tatou; a ia pulea ma nofo mau le Atua i o tatou loto.
- ii. Ia galue mai lona mana e liliuina ai loto o faanoanoa, loto ua mamao ese ma ia ona o

Satani ma ana faiga, ia taitai atu i lona Malo faavavau.

- iii. Ia tumau mai lona alofa ma silafia mea ua tatou mafatia ai, ia laveai mai ia tatou iloa ona faailoa lona alofa tele i tagata.

Novema 5 - 11, 2017

Tusi Faitau: Faataoto 14: 24-35

f. 29 “O le ua faatoatoa, e tele lona mafaufau; a o le ua itagofie, e faaeaina i luga e ia le valea.”

Autu: Ia pulea lelei lou mafaufau.

Faafetai i le Atua:

- i. Ona o le mafaufau ua tu’uina i totonu ia i tatou e faatonutonuina ai mea tatou te faia o Aso uma.
- ii. Ona o Iesu ma lona afio mai, ua le ma suesueina e tagata lona atamai ma mea ua ia faia; ua maua ai lo tatou lavea’iina.
- iii. Ona o le meaalofo o le faatuatua ua tuuina i le tagata talitonu, ua fai ma malamalama i ituaso pogisa o le ola.

Faatoese i le Atua:

- i. Ona o le le pulea lelei o tatou mafaufau, ua tosina gofie i le matalasi o le olaga ma galo ai le Atua i mea ua tatou faia.
- ii. Ia faamagaloina le tagofia e nisi o fualaau faasaina ua faaleagaina ai mafaufau, ma avea ma faasoesa i le olaga.
- iii. Ina ua tatou augatata e mafaufau loloto i lona faaali mai i mataupu aoga, ina ua faamoemoe e faia mai e isi faaiuga mo i tatou.

Tatou tatalo i le Atua:

- i. Ia le pulea e le valea o mea tutupu i le olaga o tatou mafaufau, ae foai mai le atamai e iloa ai faavasega mea lelei e ao ina faia.

- ii. Ia pulea i le amiotonu ma le amio mamā o tatou mafaufau, e faia ai mea sili ma faaolaina ai agaga ua pau’u atu i le leaga.
- iii. Ia alofa mai ia i tatou ma a tatou fanau, lavea’i mai nai le tele o faafitauli o feagai o Aso uma ia faasaoina ai o tatou ola.

Novema 12 - 18, 2017
Tusi Faitau: I Peteru 3: 8-12

f. 10 “Aua o lē fia manao i le ola, ma ia iloa aso lelei, soia le tautala lona laulaufaiva i upu leaga, ma ona laugutu aua le tautalatala faa’ole’ole.”

Autu: Ia puaina atu i le gutu upu lelei e viia ai le Alii.

Faafetai i le Atua:

- i. Ona o le gagana o le alofa o loo faamatala ai lona silisiliese ma lona matagofie i e o tausisi atu i ana faataitaiga lelei uma lava.
- ii. I le gagana o le filemu ua avea ma vai malū i loto mafatia, ma to’amalie i taimi vevesi; ao se faaola totoga i le le mautonu.
- iii. Ona o le a’oa’o mai o le Tusi Paia ia faagesegese ona tautala, ae faalologo atu i lou fetalai mai e maua ai manatu fou ma anoa.

Faatoese i le Atua:

- i. Ona o upu faatupu vevesi tatou te tautala ai, faatasi ma upu faamaualuluga e le maua ai se to’a malie.
- ii. Aua ua fai i tatou matutua ma faataitaiga leaga i fanau i upu masoā ma upu leaga tatou te tautala i ai i Aso uma.
- iii. Ina ua le mafaufau lelei tatou i upu tatou te tautatala ai, ma folafola ai lona alofa tunoa; ua faamanualia ai loto o e faalogo i ai.

Tatou tatalo i le Atua:

- i. Ia foai mai le gagana tatou te avatu ai lona filemu i le mea o i ai le vevesi ma le feitaga'i.
- ii. Ia a'oa'o mai i tatou i taimi tatau e tautala ai, ae sili ona foai mai le loto matala e iloa ai ona faalogo ma tuuina atu ai fesoasoani tatau i taimi e moomia ai.
- iii. Ia faamatala mai o tatou laulaufaiva, e momoli ai upu o le ola; ia mulimuli atu tagata i lana afio ma lona finagalo.

Novema 19 - 25, 2017
Tusi Faitau: Hosea 10: 9-15

f. 12 “Ia outou lulu saito mo outou ma le amiotonu, ia outou selesele mai ma le amio lelei; ia outou suatia lo outou fanua vaoa; auā ua oo i ona po e saili atu ai i le Alii, seia afio mai o ia, ma faatotō ifo le amiotonu i luga ia te outou.”

Autu: Ia totō le mea o e manao e te selesele.

Faafetai i le Atua:

- i. I fua lelei ua tatou maua mai ia tatou galuega o le tausaga, ua avea ma manuia e tagolima i ai i mea tatou te manano ai.
- ii. Ona o le onosai ma le faapalepale i lo tatou olaga solomuli ma le fua mai i le agasala, e ui tatou te iloa e le lelei.
- iii. Ona o lona a'oa'o mai ia i tatou i le mea tatau ona tatou fuaina atu, ina ia fua mai ai lana amiotonu ma lona alofa tunoa.

Faatoese i le Atua:

- i. Ona o le ola paie ma le faatamala ua tatou totōina i o tatou olaga, ua le mafai ai ona tatou maua ona manuia e tele.

- ii. Ua fai le ola faafifilemu ma mea suamalie i nisi, ua avea ma alofaga o le ola mativa ma le le tagolima.
- iii. Ona ua na ona tatalo atu i ona manuia, a ua auagatata e galueaiina le vao ma le gaitaifale ua tumu i ona tamaoaiga.

Tatou tatalo i le Atua:

- i. Ia fua tele mai lo tatou olaga i fua e matagofie ma lelei, e avea ai o tatou aiga ma e faia lona finagalo.
- ii. Ia alofa i faatoaga ua totōina e tausia ai o tatou aiga, ia faapea foi i faiga faiva i le tai, ia manuia sailiga a le tagata.
- iii. Ia loto malie le tagata i lana foai alofa ua aumaia tatou te ola ai, ia vivii ma faafetaia ai pea lona alofa i Aso uma.

TESEMA

Novema 26 - Tesema 02, 2017

Tusi Faitau: Kalatia 2: 14-21

f. 20 “Ua faasatauroina faatasi i maua ma Keriso; ou te le toe ola a’u, a o Keriso o loo ola i totonu ia te au; o le ola foi ou te ola ai nei i le tino, ou te ola ai lava i le faatuatua i le Alo o le Atua, o le na alofa mai ia te au, ma foaiina mai o ia e ia mo a’u.”

Autu: Ia soifua Keriso i totonu ia te oe.

Faafetai i le Atua:

- i. Ona o le afio mai o Keriso ma liutino tagata i le lalolagi, ua avea ma manuia lona alofa le faatuaoia ua magalo ai tatou.
- ii. Ona o lo tatou valaauina e fai ma ana mea faigaluega e folafola atu lona afio mai, ua tauamiotonuina ai i tatou i le faatuatua ia te Ia.

- iii. Ona o le tala o lona afio mai, ua fai ma tala o le ola i e le taualoa ma amanaia i faalapotopotoga, ua maua ai le faamoemoe fou.

Faatoese i le Atua:

- i. Ona ua tatou taumafai ia liliu mai tagata i le faakerisiano, ae ua tatou ola pea i le pouliuli ma le pogisa o tatou olaga.
- ii. Ina ua fai i tatou ma e le talitonu i lona afio mai, aua ua faalotolotolua o tatou manatu.
- iii. Ia faamagaloina lo tatou agasala pea, ua avea ma ala leaga e tauvaleina ai le afio mai o Iesu Keriso i le lalolagi.

Tatou tatalo i le Atua:

- i. Ia soifua Keriso i o tatou loto, ia avea ai pea i tatou ma tagata manuia o lana faaolataga faapei ona ia finagalo ai.
- ii. Ia tasi tagata uma i le ola faatuatua faapei ona ia afio mai, ia fealolofa'i ma fetausia'i, ia loto gatasitasi i le faatuatua.
- iii. Ia faamanuia i e matitiva moni ma lē amanaia i tototnu o nofoaga o soifua ai, ia sili ona tamaoaiga i le faatuatua ma le fia faia o lona finagalo paia.

Tesema 3 - 9, 2017
Tusi Faitau: Luka 1: 67-79

f.68-69 "Ia viia le Alii le Atua o Isaraelu, ona ua asiiasi mai o ia, ma togiolaina lona nuu, ma ua faatuina le faaolataga mamana mo i tatou i le aiga o lana auauna o Tavita."

Autu: O le faaolataga mo le lalolagi.

Faafetai i le Atua:

- i. Ona o le faaolataga ua uma ona aumaia, ua laveaiina ai le tagata agasala.

- ii. Ona o le malamalama ua faamalamalama mai i lo tatou lalolagi pogisa, ua fai ma faamoemoe o le tagata atuatuva.
- iii. Aua ua avea lona liutino tagata ma alalaupapa lelei e faalogo, vaai ma tatou faia ai lona finagalo ma le le masalosalo. Ua tatou tufa ma faasusulu atu foi ma le mautinoa i le faatuatua lona alofa na afio mai ai.

Faatoese i le Atua:

- i. Aua ua tatou iloa lana faaolataga, ae ua faia pea le agasala ma le mea ua tuinanau i ai o tatou loto.
- ii. Ona ua susesue pea le tagata i faamaoniga o lona afio mai ona o le masalosalovale, ua avea ai le faatuatua ma mea le mautinoa.
- iii. Aua ua punitia la tatou vaai a'e i le Alii ma le faasusuluina atu o le faaolataga na ia afio mai ai, i le fefe ma le augata, o le ma ma le palaa'i ona o manatu o e o matamata mai.

Tatou tatalo i le Atua:

- i. Ia pupula mai lenei vaitau o le Ativeni i loto o lana fanau faatuatua, ia fialia ai pea e molimau i le faaolataga na afio mai ma Keriso.
- ii. Ia avea le faamanatuina o le afio mai o Keriso, e tumau ai le ola faatuatua i le Alii ma le le masalosalo i lana faaolataga.
- iii. Ia avea le Ativeni o lenei tausaga ma malamalama i atunuu fevataua'i, ma uso le fealofani; ia aumaia ai le leleiga i le va o ona tagata.

Tesema 10 - 16, 2017
Tusi Faitau: 1 Korinito 15: 21-28

*f. 25 “Aua e tatau ona pule o ia, seia tuuina e ia
ona fili uma lava i lalo o ona vae.”*

**Autu: O le Mesia ua afio mai ma le pule
amiotonu.**

Faafetai i le Atua:

- i. Ona o faaitaiga o le pule na e tuuina mai, e avea ai le pule ma auauna i lona tulaga ua tofia i ai.
- ii. Ona ua fai Keriso ma manumalo i le oti, o le toe fili ua faaumatia i lona toetu mai. Ua avea ma pule aoao i luga ma lalo nei.
- iii. Ona o lona alofa ua tofofi ai i tatou e avea ma pule, ma tausi mea i lana foafoaga, ua taua ai le tagata e pule faatasi ma Ia.

Faatoese i le Atua:

- i. Ina ua le usitai atu i faatonuga ma taitaiga a le pule sili, o Iesu lea; ua uma ona ia tuuina mai e taialaina ai lo tatou avea ma pule.
- ii. Ona ua tatou leiloa ona sōlaupule a tatou faaiuga, ina ua faaululumamau o tatou manatu i mea ua tatou iloa.
- iii. Pe afai ua afaina ni lagona o nisi, ma taotaomia lo latou soifua saoloto e auauna atu ai i le Atua ona o a tatou faaiuga fia pule.

Tatou tatalo i le Atua:

- i. Ia tatou maua le loto maulalo e soaina ai la tatou pule, ma faalologo atu i le taitaiga mana a le Agaga Paia ua ala mai i nisi.
- ii. Ia maua foi e i latou ua ola ia tatou taitaiga le loto tetele, e faia ai faatonuga tu’uina atu ia i latou ua pulea aiga, nuu, atunuu ma Ekalesia e aunoa ma le gaupule; aua o pule uma lava mai le Alii ia.

- iii. Ia avea le faamanatuina o le Ativeni e momoli mai ai le saolotoga moni, tatou te auauna atu ai ia Iesu ma le faamaoni; e ala i tofiga ua valaauina i ai tatou e auauna ai.

Tesema 17 - 23, 2017
Tusi Faitau: Salamo 25: 1-5

f. 5 “Ia e ta’ita’i mai ia te au i le mea moni mai ia te oe, ma a’oa’o mai ia te au, auā o oe o le Atua o lo’u olataga; ou te faatalitali ia te oe i le Aso atoa.”

Autu: Ua fai le Atua ma malu o le tagata ola.

Faafetai i le Atua:

- i. Ona ua avea lenei vaitau o le Kerisimasi ma tala o lona alofa, ua avea ma malu e mapu i ai le loto mafatia i taimi o puapuaga.
- ii. Ona o ala laulelei na afio mai ma Iesu i le lalolagi, ua avea ma ala matagofie mo e uma ua usitai atu i ai.
- iii. Ona o manuia ua maua e le tagata i lenei vaitau o le alofa, ua avea foi ma taimi mo aiga e momoli ai le tāua o le faafetai fai faatasi; auā ua a’e manuia faiva o lenei tausaga, ona o lo tatou Atua na tautai mai.

Faatoese i le Atua:

- i. Pe afai tatou te faamanatuina lenei vaitau i amioga mataga, ma fialia o tuinanauga o le tino; ae galo ai le faafetai i le faaolataga.
- ii. Ina ua avea ala lelei e ui ai le tagata ia saogalemu e fai ma ala leaga, ina ua malo mai Satani i manatu faapito ma faasausili ia i tatou.
- iii. Ina ua saili muamua le tagata i nisi faiga e malu ai i ona puapuaga, ae tomuli ona fesili i le Atua i lona faaali mai i se fesoasoani tatau.

Tatou tatalo i le Atua:

- i. Ia manuia ma saogalemu le faamanatuina o le Kerisimasi o lenei tausaga, ia aunoa ma ni puapuaga po’o mea tatou te mafatia ai.
- ii. Ia maua e tagata uma le alofa faapei ona afio mai Keriso, e fai ma malu o le ola o Aso uma i le solo lelei po’o le faigata.
- iii. Ia faatasia aiga i le fealofani, ia le faia le tagata ma fili i ona uso, ae avea le Atua ma malu e mapu i ai tagata uma, e malamalama ai eseesega.

Tesema 24 - 30, 2017
Tusi Faitau: Luka 2:8-14

f. 11. “auā o le Aso nei ua fanau ai ia te outou i le aai a Tavita le Faaola, o ia o Keriso le Alii.”

Autu: Ua liutino tagata le Atua.

Faafetai i le Atua:

- i. O lona liutino faapei o i tatou, ua avea ma sulu aoga o le ola fou mai le olaga agasala, ma le faataitaiga o le amio mama faapei o Ia.
- ii. Ona o le ala maulalo ua ia saili mai ai, a ua le lagonaina faamaoni e i tatou lana fanau lona alofa; ua le gata ai lona faamaoni.
- iii. Ina ua fai lona afio mai ma ala laulelei e faatasia ai aiga, o uso sa vava mamao, ma loto sa fefulituaa’i, ua maua ai fealofaniga lelei.

Faatoese i le Atua:

- i. Ina ua ese ala ua tatou famamafaina e faamanatu ai lona liu tagata, ma lona afio mai i le lalolagi.
- ii. I le faatamala pea o le Kerisiano i ona faiva ua valaauina ai e faia lona finagalo. Ua faamuamua pea lo tatou vaai ifo, ma le maua ai loto o lana fanau o galala i le fia inu i le upu moni.

- iii. Ina ua liu tupua masima pea o tatou manatu, aua ua tepa i tua ma faamuamua fiafiaga; a ua galo ai le vaai atu i le lumanai ma lona alofa faaaauau.

Tatou tatalo i le Atua:

- i. Ia faamalūlū mai o tatou loto, ia famaoni ai i lenei tausaga e faamanatu le liutino tagata o le Alii, i ala ua tatau ai.
- ii. Ia avea lenei vaitau ma meaalofo sili mo tagata uma o le lalolagi o aafia i mafatiaga eseese, ma ia maua so latou laveaiina.
- iii. Ia avea le afio mai o Keriso ma leleiga i nisi o fefulitua'i ma Malo fevataua'i; ia faanofosaoina foi le ua sauaina ma pologa pea i agasala ma tuinanauga e tele o le olaga.

IANUARI 2018

Tesema 31, 2017 - Ianuari 06, 2018

Tusi Faitau: 2 Tesalonia 2: 13-17

f.16-17 “O lo tatou Alii lava o Iesu Keriso, atoa ma le Atua lo tatou Tama, o le ua alofa mai ia te i tatou, ma na foai mai le faamatala loto faavavau, ma le faamoemoe lelei i le alofa tunoa, ia faamafanafana atu e ia i o outou loto, ma ia faatumauina outou i galuega lelei uma ma upu lelei uma.”

Autu: Tulai ia, ma faaauau i le galuega.

Faafetai i le Atua:

- i. Ona o lona alofa ua mafai ona tatou faaauau mai ai galuega lelei i lenei tausaga.
- ii. Aua ua avea pea lona Agaga Paia ma paolo e maua i ai le malosia fou ao feagai ma faaiuga le faigofie mo aiga, galuega, Malo ma lana galuega.
- iii. I lona alofa tunoa ua tele, aua e ui ina mamao le tagata ma lē manatua o Ia; ae ua le taofia ai lona fesoasoani mai, e taitai atu i tatou i le moa o le ala ma faatonu mai i lo tatou vaivai.

Faatoese i le Atua:

- i. I le tele o mea ua tatou toilalo ai, ona ua tuinanau o tatou loto e faamalie i o tatou manao; e ui lava o loo mafatia ai nisi.
- ii. Ona o lo tatou ola faatalalē, ua manatu māmā ai i tofiga ua tatou galulue ai; ua avea ai le ola auauna o le mea e faia e nisi ua tatou taitaiina, ae le o tatou ua umia tofiga.
- iii. Ia alofa mai ma faamagalo lo tatou iloa o le mea e tatau ona fai ae ua tatou le faia, aua ua faafiaamionu i tatou i luma o tagata.

Tatou tatalo i le Atua:

- i. Ia foai mai le iloa e mafai ai ona faamalūlūina o tatou loto e le Agaga Paia, e tulai ai ma auauna atu ma le faamaoni.
- ii. Ia avea le faaiuga o galuega o lenei tausaga ma oso e amata manuia ai lena tausaga fou.
- iii. Ia maua le loto mataala ma le fanaufouina e tagata o lana Ekalesia e tulai ai ma galulue ma le faamaoni i toe Aso o lenei tausaga, ma lena tausaga fou.